

YESU HIMANI?

Ha

Mutsari: Tom Small

Published with permission of
International Publications Services
www.ipsimb.com

“WHO IS JESUS?”
is part of the ‘Bible Way’ correspondence course

Other titles in this course are:-

“Basic Bible Teachings”

“God’s Wonderful Plan”

This course was translated into Shangaan / Tsonga

Translated, printed and published by:
Mozambique School of the Bible.

P O Box 37497, Faerie Glen,
Pretoria, 0043.
South Africa.

E-mail:- hstead@lantic.net

This book is the property of and is hereby used with the permission of:

International Publications Services

P.O.Box 1759, Edenvale, 1610

Rep. South Africa

www.ipsimb.com

©Copyright, 2002, International Publications Services

All Rights Reserved

500 copies: June 2001 (Pub 42)

200 copies: May 2005 (Pub 42)

TIMHAKA TI NGA ENDZENI KA BUKU LEYI

DYONDZO

PAPILA

	XITSUNDZUXO XA RISIMA NI THLAVUKANYISO.	4
1.	YESU HI YENA LOYI A TSEMBISIWEKE EKA TESTAMENTE YAKHALE.	5
2.	YESU HIYENA N’WANA WA XIKWEMBU.....	10
3.	YESU I XIKWEMBU.	14
4.	YESU A A RI MUNHU LA NGA RI KI NA XIDYOHO	19
5.	YESU I RITO RA XIKWEMBU.....	23
6.	YESU A NI MATIMBA HINKWAWO	28
7.	YESU I XINYEMPFANA XA XIKWEMBU.....	33
8.	YESU HI YENA MUPONISI.	37
9.	YESU HI YENA MUHLURI WA RIFO	42
10.	YESU I HOSI.	46
11.	YESU I MUAVANYISI.....	51
12.	YESU I WA VANHU HINKWAVO.....	55
	XIRHAMBO XA KU YAMUKELA YESU KRISTE.....	58

XITSUNDZUXO XA RISIMA NI THLAVUKANYISO.

BIBLE WAY CORRESPONDENCE SCHOOL i xikolo lexi endleriweke vanga kumangiki enkarhi wa kuya exikolweni xa Bibebe. Nakuve tidyondzo takona ti lulamisiwile hi ndlela leyi yaku hambu lava dyondzeke Bibebe hi malembe vata pfuneka hi tidyondzo leti.

A kongometo wa tidyondzo leti i kukombisa kungu ra Xikwenbu raku ponisa vanhu, kunyika wutivi ehenhla ka Bibebe ni kuendla leswaku mupfumeli akula eka wukriste bya yena.

Bibebe yi fanela kuva kusuhi na wena loko uri karhi u landza tidyondzo leti. U fanela kuhlaya khwatsi ndzimana leyi longoloxiwaka kun'we ni dyondzo leyi u yi landzaka. Kungaku loko u tshuka u kuma marito eBibeleni kumbe edyondzweni, lawa u nga matwisisiki, swinga saseka kuva u ti lavela dicionario lerinene.

Loko u ri karhi u dyondza Bibebe swina risima kutsundzuka leswi yi vulaka swona. Hikokwalaho tinyiketele kuhlayisa hi nhloko tindzimana ta Bibebe leti u lerisiwaka kuti hlaya. Tindzimana leto u ta ti kuma ti tsariwile eku sunguleni ka dyondzo yin'wana ni yin'wana ya xibukwana lexi.

KUCHICHA KA ENDEREÇO. Kungaku loko u tshuka u chicha ndhawu ya lomu u tshamaka kona, ha kukombela leswaku u tivisa Director wa Bible Way.

Ta Hlayo Ya Mudyondzi. Mudyondzi un'wana loyi anga eka BIBLE WAY CORRESPONDENCE SCHOOL, a nyikiwa hlayo ya yena. Hlayo leyo yi ni risima hikuva xaxameto ya mitirho ya wudyondzi bya wena yita longoloxiwa ehansi ka hlayo ya wena. Loko u tsalela Director wa Xikolo xa Bibebe Way U fanela kutsala vito ra wena ni hlayo ya wena ya wudyondzi, ni endereco.

LEYI HI YONA HLAYO YA WENA

(Kuhava un'wana l'a nga ni hlayo ya kufana ni ya wena.)

DYONDZO 1.

YESU HI YENA LOYI A TSEMBISIWEKE EKA TESTAMENTE YAKHALE.

NDZIMANA YA KU YI HLAYISA HINHLOKO

“Hi yena loyi vaprofeta hinkwavo va vuleke vumboni ehenhla ka yena loko va te: Un’wana ni un’wana la pfumelaka ka yena, ú ta kuma ku rivaleriwa ka swidyoho hi vito ra yena.” Mintirho 10:43.

RITO RO RHAANGA

Eka tidyondzo leti landzelaka ta chumi na timbirhi hi ta dyondza ta ntiyiso leyikulu mayekana na Jesu leyi dyondzisiwaka eRitweni ra Xikwembu, eBibeleni. Madzana-dzana yamalembe na Yesu a nga se tswariwa vaprofeta vaTestamente ya Khale va vulavurile marito ya Xikwembu navaku Xikwembu xi ta rhuma Muponisi emisaveni. Avavulanga ntsena ta ku vuya ka Muponisi kambe va vulavurile ni swin’wana mayelana ni leswi avutomi ra yena ri ta ka va xiswona.

Kutani a hi nga ehleketeni katsongo mayelana ni ndzimana ya ku yi hlayisa hi nhloko leyi hi yhi voneke laha ehenhla, Mintirho 10:43. Loko Petro a ri karhi axumayela ekanthsungu lowu nga hlanganile avulavurile hi marito lawa ma kumekaka eka ndzimana ya hina ya ku yi hlayisa hi nhloko. A va tsundzuxile leswaku vaprofita hinkwavo lavanga vulavula hi ta Yesu swin’we ni makumela ya kuponisiwa eswidyohweni hikwalaho ka ku pfumela ekayena.

Eka dyondzo leyi yakusungula hi ta dyondza ta swiprofeto swa Testamente yaKhale mayelana ni muponisi la tsembisiweke na swona hi ta langutisa eka Testamente Leyinthswa akuva hi ta vona hi laya swiprofeto swi tatisiweke hakona eka Yesu Kriste. Loko hi ri karhi hi dyondza hi fanela ku tsundzuka leswi -- vaprofita va Testamente ya Khale vahnyile himalembe la’yotala na Yesu a nga si tsvariwa. Va vulavurile hi laha va lerisiweke hakona hi Xikwembu ni Moya waxona naswona timhaka hinkwato leti va ti vulavuleke tiendlekile hi laha va ti vuleke hakona.

ENDHAWU LEYI YESU A TSWARIWEKE EKA YONA YI PROFETIWILE

Hlaya Mikiya 5:2

Mika a vulavurile marito lawa laha ku nga ve ni malembe ya nungu wamadzana na Jesu anga si tswariwa. A swi endleki kuva munhu a va ni vutivi lebyi. A nga swi tiva ntsena loko adyondzisiwa hi Moya wa Xikwembu. Kutani pfula eBibeleni ya wena u hlaya eka Matewu 2:1-6. Ina, Yesu hi yena loyi anga ta tatisa swiprofeto swa Testamente yaKhale.

KUVELEKE KA WANHWANA KU PROFETIWILE

Hlaya Esaya 7:14

Ha switiva leswaku wanhwana a nga ka a nga veleki na a nga tivi wanuna loko i nga ri ntsena hi matimba ya Xikwembu. Hi leswi swi endlekeke kunene. Eka Luka 1:26-35 hi hlaya hi ta Mariya loyi a nga ha ri nhwana, loyi ahlawulekeke kuva mana wa Yesu. Hambi leswi Yosefa a nga tiviwa leswaku hi yena tata wa Yesu wa laha emisaveni, Rito ra Xikwembu ri hi byela erivaleni leswaku Yosefa na Mariya a va hlangananga ku ko Yesu a tswariwa. Mhaka leyi hiyi kuma eka Matewu 1:18-25. Marito ya Esaya amatatitsiwanga ku ko kuhela malembe layotala. Kambe kute loko Yesu a tswariwile ku hetisekile hinkwaswo leswi thsembisiweke hi Xikwembu hi minomu wa muprofita Esaya.

KU PROFETIWILE LESWAKU YESU A TA VE NI MOYA WA XIKWEMBU.

Hlaya Esaya 42:1

Loko hi hlaya Testamente Leyinthswa hi kuma leswaku xithsembiso lexi vuriweke hi Esaya xihetisekile kunene. Kunene Yesu atatiwile hiMoya wa Xikwembu. Moya wa Xikwembu wu tyiwa leswaku iMoya LowoKwetsima eka Testamente Leyinthswa. Hlaya khwatsi timhaka leti kumekaka eka Yohane 1:32-34, ni Yohane 3:34, 35.

KUKANETIWA KA YESU KU PROFETIWILE

Hlaya Esaya 53:3

Hi malembe la'yotala vaIsrael a va ri karhi va langutela Muponisi hikokwalaho ka marito ya vaprofeta. Hambi leswo a va twisisanga ta matsamela ya Muponisi loyi Xikwembu a a xi ta rhuma yena. A va langutela Muponisi loyi a ata va huluxa eka valala va vona va laha emisaveni swin'we ni ku va nyika rifuwo le'rotala ni matimba. Xikwembu xi endlile ekungu ra xona ra ku rhumela Yesu leswaku a ta ponisa vanhu hinkwavo eswidyo hweni swa vona. Xikwembu xi swi tivile leswaku loko Yesu a ala ku endla kurhandza ka vanhu, kambe a vulavula hi ta zvidyoho swa vona swin'we ni fanela ya ku va vahundzuka aa va ta n'wi kaneta ni ku n'wi vamba exihambanwini. Esaya a profetile leswaku vanhu va ta ala Yesu enkarhi wa ku leha Yesu na a nga si vuya. Hi twisisa leswaku Yesu a hetisile evuprofeta lebyi.

Eka Testamente Leyinthswa hi hlaya hi laha va n'wi vengeke hakona Yesu hi vakulukumba ni tihosi na swona hi vugamo va n'wi vambile exihambanwini.

KU NGHENA KA YESU EYERUSALEMA KUPROFETIWILE

Hlaya Zakariya 9:9

Exiprofeto lexi xi hlamusela khwatsi hi laha Yesu a ata ngena hakona eYerusalema ni leswaku a ta ti tsongahata a ta na a gadile mbhongolo. Kutani hlaya Matewu 21:1-9. Leswi swi endlekile evuton'wini ra Yesu hi laha swi thsembisiweke hakona hi vaprofeta vakhale.

KUXAVISIWA KA YESU KUPROFETIWILE

Hlaya Pisalema ya 41:9

Matsalwa ma hi byela leswaku muxavisi wa Yesu a tava munhu loyi adyaka na yena. Yuda Iskarioti hiyena aveke munhu wakona. A thsamile tani hi mudyondzisiwa wa Yesu hi malembe manharu. Na yena axumayerile. Kambe mbilu ya yena a yi nga lulamelanga Xikwembu. Eka Yohane 12:6 hi kuma leswaku hi mikarhi leyo Yuda a a yiva mali. Hikwalaho ka ku rhandza mali a pfumerile kuxavisa Yesu, hi ku endla loko

xiprofeto xa Pisalema ya 41:9 xi hetiseka. Hlaya emhaka ya kona ekaMatewu 26:14-16 ni Matewu 26:20-25.

RIFO RA YESU RI PROFETIWILE

ku ni swiprofeto leswotala eka Testamente ya Khale mayelana ni kufa ka Yesu laha ka ku a swi nge aneri kuswi andlalata hinkwaswo eka dyondzonyana leyi. Kambe hi ta khwimba switsongo swakona. Hi ku sungula hlaya ta ku vambiwa ka Yesu eka Matewu 27:27-50 ktani hi ta vona man'wana matsalwa mayelana ni kuprofetiwa ka mafela ya Yesu.

1. Kuhuwelela ka yena eka Xikwembu Pisalema ya 22:1 ni Matewu 27:46)
2. Kutseketseriwa ka yena hi vanhu (Pisalema ya 22:6-8, ni Matewu 27:39-43).
3. Mavoko ni milenge ya yena yi thlabyiwile (Pisalema ya 22:16, ni Yohane 20:25). Emikrini ya Yesu loko munhu a vambiwa a a milenge ya yena ni mavoko a a swi gongondzeriwa exihambanwini laha a hayekiwaka kona.
4. Va hlahluerile hi vuhlolotwana ehenhleri ka tinguvo ta Yesu (Pisalema ya 22:18 ni Matewu 27:35).
5. Rifo ra yena a ve hikwalaho ka swidyoho swa hina (Esaya 53:6 ni 2 Vakorinto 5:21).
6. Ku miyela ka yena loko va n'wi avanyisa (Esaya 53:7 ni Matewu 27:12-14).
7. A rhendzeleriwe hi vadyohi (Esaya 53:12 ni Marka 15:27, 28).

KUPFUKA KA YESU EKU FENI KU PROFETIWILE

Hlaya Pisalema ya 16:10

Hlaya eka Mintirho 2:22-27. Loko muApostola Petro a xumaela hi siku ra Pentekosta a tirhisile matsalwa ya Tipisalema tani hi xikombiso xa leswaku Xikwembu xiprofetile hi ta ku pfuka ka Yesu eku feni. Kute loko Petro ahatile kuhaxa marito ya yena vanhu vatwisisile leswaku Yesu a tatisile swiprofeto swa Testamente yaKhale hi mukhuva wihi. Vapfumerile

leswaku Yesu hi yena Muponisi loyi atshembisiweke hi matsalwa. Hi siku lero vanhu lava ringanaka makhulu manharu va hundzukile kutani va amukela Yesu tani hi Hosi ya vona. Hi kuendla loko va rivaleriwile swidyoho swavona ni ku amukela evutomi lebyi nga heriki.

KULAVEKA U HLAYA KWATSI TINDZIMANA LETI LANDZELAKA.

Mintirho 10:43	Esaya 42:1	Esaya 7:14
Esaya 53:3, 6-7, 12	Yohane 3:34-35	Matewu 1:18-25
Pisalema ya 41:9	Matewu 26:14-16, 20-25	Yohane 12:4-6
2 Vakorinto 5:21	Pisalema ya 16:10	Marka 15:27-28
Mintirho 2:22-27	Mikiya 5:2	Yohane 1:32-34
Luka 1:26-35	Matewu 2:1-6	Matewu 21:1-9
Zakariya 9:9	Matewu 27:12-14	Yohane 20:25
Matewu 27:27-50	Pisalema ya 22:1, 6-8, 16, 18	

DYONDZO 2.

YESU HIYENA N'WANA WA XIKWEMBU.

Ndzimana ya ku yi hlayisa hi nhloko:

“Kutani ku twakala rito leri humaka etilweni, ri ku: ‘Loyi i N’wananga la rhandzekaka, loyi ndzi n’wi tsakelaka.’” Matewu 3:17.

RITO RO RHANGA

Eka dyondzo leyi hi ta dyondza hi leswi tsariweke eBibeleni mayelana na Yesu tani hi N’wana wa Xikwembu. Kuni vanhu van’wana lava nge:

Hapfumela leswaku Yesu i n’wana wa Xikwembu ha pfumela hi leswaku vanhu hinkwaavo i vana va Xikwembu. Xikwembu xi hi vumbile hinkwerhu naswona hi xona Tata wa hina wa letilweni.

Marito lawa **A HI WONA** la ma dyondzisiwaka eBibeleni mayelana na Yesu tani hi N’wana wa Xikwembu. Hi ta vona leswaku Bibeke yi dyondzisa leswaku Yesu hi yena N’wana wa Xikwembu la nga tsvariwa yena yexe. A ku va nga ni un’wana a ku nag ha tiva ni un’wana la nag ni vuxaka ni Xikwembu tani hi yoloyi.

YESU A NGA VA NGA NI TATANA WA LAHA EMISAVENI

Hlaya khwatsi eka Matewu 1:18-25 ni Luka 1:26-35. Eka matsalwa lawa hi hi dyondza leswi landzelaka. Josefa na Maria vakanga vavimbisana kuzowanana. Ntsumi Gabrieli yi ti kombisile eka Maria yi n’wi tivisa leswaku a ta veleka n’wana. Yena aku swi nga ka swi nga endleki hikuva aa anga tivi wanuna. Ntsumi yi n’wi byerile leswaku Moya Lowokwetsima u ta va eka yena naswoana n’wana loyi a ta ka n’wi veleka a ta va N’wana wa Xikwembu. Loko Yosefa a tivile leswaku Mariya a a ri kusuhi ni ku veleka a ehleketile ku n’wi tsika. Ntsumi yi ti kombisile eka Yosefa evurhongweni yi n’wi byela ta leswi Mariya a nga kuma nyimba hakona. Hi kuendla loko Yosefa atekile Mariya tani hi nsati wa yena kambe a nga hlangana na yena ku ko yesu a tsvariwa. Hivona hakona leswaku yesu a a

nga ri na tatana wa laha emisaveni hikuva Mariya a kumile khwiri hi Moya Lowokwetsima.

NTSUMI GABRIELI YI VURILE LESWAKU YESU A TA VE N'WANA WA XIKWEMBU

Hlaya na kambe eka Luka 1:35. Kutani endla xivutiso lexi, Mayelana ni ni mrito ya ntsumi Gabriel, Yesu hi mani? Hi vona ha kan'we leswaku ehlamulo leyi nga kona i yin'we ntsena - Yesu i N'wana wa Xikwembu. Vanhu lavotala vatolovela va ringeta hi vuthlari ku vitisa leswaku Yesu i mani. Ntsumi leyi vuyeke hi letilweni hi vutivi lebyi tlulaka bya vanhu a yi va nga ni swivutiso swo tano. A yi tiva leswaku Yesu i N'wana wa Xikwembu.

YOHANE MUKHUVURI A VURILE VUMBONI BYA LESWAKU YESU I N'WANA WA XIKWEMBU

Pfula eka Yohane 1:29-34 u hlaya matsalwa lawa. Xikwembu a xi rhumerile Yohane Mukhuvuri leswaku a ta lulamisa timbilu ta vanhu akuva vahundzuka va ta amukela Yesu Muponisi loyi a tshembisiweke. Xi endlile leswo leswaku vanhu va ta kota ku hundzuka. Xikwembu xi byerile Yohane eswikombiso leswi a ata tiva haswona Yesu loko a fika. A ata n'wi tiva hi ndlela yihi? Hlaya nakambe ndzimana ya 33. Yohane loko avonile Moyo loKwetsima na u xika enhleni ka Yesu a tivile leswaku hi yena Yesu Muponisi la languteriwaka. Nayena a vurile vumboni bya leswaku Yesu a ari N'wana wa Xikwembu -- ndzimana 34.

XIKWEMBU HI VUKULU BYA XONA XI VURILE EVUMBONI BYA LESWAKU YESU I N'WANA WA XONA

Tindzimana leti landzelaka ta hi dhlunyatisela mhaka leyi: Matewu 3:16, 17; Matewu 17:5; Marka 9:7; ni Luka 9:34, 35. Vadyondzisiwa vatwisisile leswaku rito leri va ri tweke aa riri ra Xikwembu. Malembe lawa malandzeleke Petro loko a tsala ta leswi swiendlekeke hi siku leri Yesu a vangameke ethsaveni, ate Yesu ayamukerile kudzuneka ni ku twala hi Xikwembu Tatana. Va twile rito na ri ku, Loyi i N'wananga, loyi ndzi n'wi rhandzaka ni ku n'wi tsakela (2 Petro 1:17-18). Xikwembu aa xi rhandza kuva vanhu va twisisa leswaku Yesu i N'wana wa xona.

MIMOYA YA TYAKA YI VURILE EVUMBONI BYA LESWAKU YESU I N'WANA WA XIKWEMBU

Kune tindzimana tingari tingani eBibeleni laha mimoya ya tyaka yi tiveke Yesu ni ku vula leswaku i N'wana wa Xikwembu. Ahi languteni eka ndzimana yin'we kumbe timbirhi mayelana ni mhaka leyi. Hlaya Luka 8:26-39. Eka tindzimana leti mimoya ya tyaka yi vurile leswaku Yesu hi yena la kotaka ku yi herisa. Kutani pfula eka Marka 1:23-27. Laha mimoya ya tyaka yi vurile leswaku Yesu hi yena Mukwetsimi wa Xikwembu. Tsundzuka leswaku Yesu a lerisile leswaku mimoya liya yi miyela. A nga pfumelelanga mimoya ya tyaka kumbe lava vatshamiweke hi moya wa Satani va xumayela ta yena. Himani a fanelaka kuvula hi ta Yesu? Hlaya na kambe eka Luka 8:39. Evutomi bya wanuna loyi aa byi lulamisiwile hi matimba ya Yesu. Vanhu lava lulamisiweke ni ku ponisiwa namunthla hi vona va fanelaka vulaka vumboni bya ntirho wa Yesu.

VADYONDZISIWA VAVURILE EVUMBONI BYA LESWAKU YESU I N'WANA WA XIKWEMBU

Hlaya eka Matewu 16:13-17 ni Johane 6:67-69. Vadyondzisiwa a va tshamile na Yesu hi malembe ma nga kusuhi ni manharu. Va vonile mahanyela ya yena. Va n'wi twile na a dyondzisa timhaka leti hlamarisaka ta Xikwembu. Va vonile evutomi bya yena lebyi nga ri ki na vuyoho. Va tivile leswaku Yesu i N'wana wa Xikwembu ha kunene.

YESU HAYEXE A VURILE LESWAKU I N'WANA WA XIKWEMBU

Loko va ri karhi va thethisa Yesu vanhu ava ri karhi va yingisa ku pfumalekile evumboni lebyi va nga n'wi nyikaka nandzu wa xidyoho ha byona. Kutani va n'wi endlela xivitiso lexi: Xana hi wena Mesiya, N'wana wa Xikwembu lexi dzunekaka ke? Yesu a ku: "Hi mina" (Marka 14:60-62). Loko Yesu aa hlamurile leswaku a hi yena N'wana wa Xikwembu, ku swi lava na a rivaleriwile. A yarile kuva vula mavunhwa. A a lava leswaku vanhu va twisisa leswaku yena i N'wana wa Xikwembu.

KUPFUKA KA YESU I VUMBONI BYA LESWAKU YENA I N'WANA WA XIKWEMBU

Yesu loko a ha ri ni vadyondzisiwa va yena a va byerile ha kanyingi leswaku a ta dhlayiwa ni leswaku hi siku ra vunharu a ta pfuka esirheni (Matewu 16:21; Yohane 2:18-22; Yohane 10:17, 18). Vavengi vaYesu navona va twile mhaka leyi. Hi swona swivangeleke kuva varingeta hi ti ndlela hinkwato ku siverela kupfuka ka Yesu. Va vekile ribye lerikuku enyangweni wa bakwa lomu kulahliweke ntsumbu wa Yesu. Valerisile leswaku kuvekiwa swilemo ehenhla ka ribye lero. Va vekile ni varindzi leswaku va ta vonelela nyangwa ya sirha. A va ri swihunguki swonghasi! Matimba ya munhu a ma nga swikoti ku yimisa ntiro wa Xikwembu. Yesu a pfukile ekufeni hi laha a vuleke hakona. Ekufuka ka yena ku kombisile leswaku a vulavurile ntiyiso. A ve xikombiso xa leswaku yena i N’wana wa Xikwembu. (Varhoma 1:4).

Kunene Bibeke yi dhlunyatisa timhaka ta Yesu. Hi yena N’wana wa Xikwembu. Kuyala mhaka leyi i ku yaka Rito ra Xikwembu. A hi amukeleni ntiyiso leyi ya ku Yesu hi mani hi va hi tshemba yena emikarhini hinkwayo tani hi N’wana wa Xikwembu ni muponisi wa hina.

Xana Bibeke - Mahungu Lamanene iya wena ke?

KULAVEKA LESWAKU U HLAYA KHWATSI ETINDZIMANA LETI LANDZELAKA.

Matewu 3:16-17	Luka 9:34-35
Matewu 17:5	Luka 8:26-39
Matewu 16:13 – 17:21	Yohane 2:18-22
Matewu 1:18-25	Yohane 10:17-18
Marka 14:60-62	Yohane 1:29-34
Marka 9:7	Yohane 6:67-69
Marka 1:23-27	2 Petro 1:17-18
Luka 1:26-35	Varhoma 1:4

DYONDZO 3.

YESU I XIKWEMBU.

Ndzimana ya ku yi hlayisa hi nhloko:

“Eku sunguleni ka swilo hinkwaswo, Rito a ri ri kona, Rito a ri ri na Xikwembu, kutani rito a ri ri Xikwembu.” Yohane 1:1.

RITO RO RHANGA

Hi dyiondzile eka dyondzo leyi hundzeke leswaku Yesu i N’wana wa Xikwembu. Eka dyondzo hi ta vona leswaku naswona Yesu ha yexe i Xikwembu. Swi nga endle na u ri xivitiso: A ndzi swi twisisi -- Yesu a nga N’wana wa Xikwembu a thlela a va Xikwembu hi ndlela yihi? Ekusunguleni ka hinkwaswo eku dyondzeni loku hi fanela kutwisisa leswi landzelaka -- Xikwembu i Nkulukumba kutlula kutwisisa ka hina hinkwako. mukuru. Leswi hi swi tivaka mayelana ni Xikwembu hi leswaku Xikwembu xi swi hlawurile leswaku hi swi tiva. A hi tivi Xikwembu hikwalaho ka vuthlari bya hina.. Eka 1 Vakorinto 1:21 hi hlaya marito lawa: “... Xikwembu xi endlile leswaku vanhu va misava hi vuthlari bya vona va tsandzeka ku tiva Xikwembu ...” Exikongomelo xa hina edyondzweni leyi i ku dyondza leswi hi dyondzisiwaka swona hi Xikwembu eBibeleni mayelana na Yesu. Hi ta vona leswaku Bibeke yi veka erivaleni leswaku Yesu i N’wana wa Xikwembu.

HIBYERIWA ERIVALENI LESWAKU YESU I XIKWEMBU

A hi voneni matsalwa mambirhi lawa ma hi byelaka mhaka leyi. Ra ku sungula hi Yohane 1:1 a nga yona ndzimana ya hina ya ku yi hlayisa hi nhlo edyondzweni leyi. Hi hlayile leswaku Rito kuvuriwa Yesu. Endimana leyi yi hi byela leswaku: “Rito a ri ri Xikwembu”. Ku kaneta leswaku Xikwembu ni Rito (Yesu) i nchumu wun’we i ku yala ntiyiso hinkwayo ni Bibeke hayoxe.

Tsalwa ra vumbirhi leri hi ta ka ri vona ri le eka Varhoma 9:5. Ndzimana leyi yi vulavula hi vana va Israel ni leswaku vayamukerile swithsembiso swa Xikwembu hi mukhuva wihi. Loko yi ya emahlweni yi hlamusela ta nyama leswaku Yesu a tsvariwile hi ndlela yihi erixakeni ra vona. Himan’wana marito emahlweni ka vanhu a vuriwa muIsrael. Kambe,

kuendlela leswaku vanhu hinkwavo va ta twisisa ta kutsvariwa ka Yesu, kuvuriwile leswaku Yesu a vekiwile ehenhle ka swilo hinkwaswo ni leswaku Xikwembu xi n'wi katekisile hi laha ku nga heriki. Hlaya Vafilipiya 2:9-11.

Entiyiso mayelana ni leswaku Yesu i Xikwembu a yi kumeki etindzimeni timbirhi ntsena. Hi ta dyondza tindzimana tin'wana leti ta ka hi pfuletela ta vumunhu bya bya yena.

MATIMBA YA YESU YA KU RIVALELA SWIDYOHU MA KOMBA LESWAKU YENA I XIKWEMBU

Xidyoho xihhi na xihhi i ku dyohela Xikwembu. Hambi hosi Davida a khongerile a ku: “Ndzi dyoherile wena, wena ntsena...” (Pisalema ya 51:4). Munhu la kotaka kurivalela xidyoho hi loyi a dyoheriweke ntsena. Hi ta vona leswaku Yesu a a ri ni matimba ya ku rivarela xidyoho (Marka 2:1-12). Eka matsalwa lawa hi dyondza leswo tala. Yesu a byerile wanuna luya leswaku swidyoho swa yena a swi rivaleriwile. Valala va Yesu va te i Xikwembu ntsena xi swi kotaka ku rivalela swidyoho. A va vula ntiyiso mayelana ni mhaka leyi. Kutani va n'wi nyikile nandzu Yesu hikuva a tiendla loyi wa matimba lawa ma fanelaka ku va ya Xikwembu ntsena. Yesu a hanyisile wanuna loyi na i ri ku komba vanhu leswaku a ni matimba ya ku rivarela swidyoho.

A hi nga vekeni mhaka leyi hi ndlela leyi. A hi nga ku ku ni indlo leyi pfariweke. Hi tiva ha kan'we leswaku ku ni mpfungulo wun'we ntsena emisaveni lowu kotaka ku pfula nyangwa wa kona. Hambi loko hi nga si ki vona n'winyi wa indlo yoleyi kambe ha swi tiva leswaku hi yena ntsena a nga ni mpfungulo. Loko a tshuka a humelela kutani a teka mpfungulo a pfula hi tekele ku tiva leswaku kunene hi yena n'winyi wa indlo. Hi tiva leswaku Xikwembu hi xona ntsena xi swi kotaka ku rivarela swidyoho. Hi ku endla loko, loko hi vona Yesu na a ta ni matimba ya ku rivarela swidyoho hi tekela ku tiva leswaku Yesu i Xikwembu.

YESU A YAMUKERILE KU DZUNISIWA LOKU FANAKA NI KA XIKWEMBU

Yesu a swi vekile erivaleni leswaku vanhu va fanela ku n'wi dzunisa tani hi leswi va dzunisisaka xi swona Tatana (Yohane 5:23). Loko u sungula ku

hlaya eka ndzimana ya 17, u ta vona leswaku vaYuda a va lavetela ku dlaya Yesu. Va te a a dyondzisa leswaku yena a ringana ni Xikwembu (Yohane 5:18). Loko Yesu a anga ringani ni Xikwembu, na a lulamisile mi ehleketo ya vona leyi a yi ta va yi nga twisisanga leswi a swi vulaka. Na a va byerile leswaku a va twisisanga leswi a swi vulavuleke ni ku va byela leswaku a nga vulanga leswaku yena wa ringana ni Xikwembu. Swive tano ke? Nakatsongo. Handle ka leswo, yesu a va byerile leswaku vanhu hinkwavo va fanila ku dzunisa N'wana, tani hiloko va dzunisa Tatana.

Nakambe, ku ringana ka Yesu ni Xikwembu ku dyondzisiwa erivaleni eka Vafilipiya 2:6. Ndzimana leyi yi hi byela leswaku Yesu a a ri xi yimo xa Xikwembu na a nga si ta emisaveni. Yesu a a switiva leswaku a ku nga ri hi ku tikurisa loko a te yena o ringana ni Xikwembu. Swikomba leswaku Yesu a a nga tekanga leswinga n'wi lumbiki loko a te yena wa ringana ni Xikwembu.

YESU A YAMUKERILE KU DZUNISIWA TANI HI XIKWEMBU

Eka Mintirho 14:8-18, hi kuma leswaku Paulo na Barnaba a va xumayela eListra. Hi matimba ya Yesu va hanyisile wanuna loyi a nga ha ri xilima. Vanhu lava nga vona xihlamariso lexi a va lava ku khongela Paulo na Barnaba. A va pfumela leswaku vanhu va matimba yanga hi lawa a va ri swikwembu leswi humaka etilweni. Paulo na Barnaba vava kawukile va thlela va va byela leswaku navona a va ri vanhu va ku fana na vona. Leswo hi swona kunene leswi a va fanela ku swi endla.

Loko muapostolo Yohane a kombisiwile xivoniso xa swa letilweni a wile hi mombo na a kongela loyi a nga ha vulavula na yena, a byeriwile leswaku a nga faneri ku endla tano. I Xikwembu nsena xi fanelaka ku khongeriwa (Nhluvutelo 19:10). Munhu loyi a nga ve karhi a vulavula na Yohane a yarile ku khongeriwa hikuva a tiva leswaku i Xikwembu ntsena lexi fanelaka ku khongeriwa. A endle swona kunene.

Sweswi hlaya Yohane 20:27-29. Endzhaku ka ku pfuka ka yena eku feni, Yesu a ti kombisile eka Tomasi. Loko loko a vonile leswaku kunene i Yesu la pfukeke ekufeni a te: “Hosi ni Xikwembu xanga” xana yesu a phikisanile na yena ke? Na katsongo. Yesu a yamukerile vumboni lebyi. A endlile tano hikuva a ri Xikwembu.

XIKWEMBU A XI RI EKA KRISTE

Hi mikarhi yin'wana vanhun a va rhandzi ku dzunisa Yesu hi ndlela leyi va dzunisaka Tatana ha yona. Va sola sola na va ku, 'loko i iri kuva Yesu a ri Xikwembu, swi vula leswaku Xikwembu xi file exihamban'wini. Ntiyiso hi leswaku hi dyondzisiwa tano eBibeleni. Eka 2 Vakorinto 5:19 hi byeriwa leswaku, Hikuva Xikwembu a xi ri na Kriste loko loko xi hlanganisa misava...

hi hlaya nakambe mayelana ni mhaka leyi eka Mintirho 20:28. Paulo a a ri karhi a vulavula ni vakulukumba va kereke ya Efesa. A va byerile leswi va nga ha fanela ku hlayisisa xiswona kereke ya Xikwembu leyi xi yi xaveke hingati ya xona. Loko u ta hlaya khwatsi ndzimana leyi u ta vona leswaku Paulo a a ri karhi a vulavula mayelana ni Xikwembu. A vula leswaku kereke ya Xikwembu kutani loko a ya emahlweni aku leyi xi yi xaveke (Xikwembu) hi ngati ya xona.

Ku ni swilo leswotala leswi hi tsandzekaka ku swi twisisa emiehleketweni ya hina. Loko hi languta laha misaveni hi vona swilo leswotala leswi hi tsandzekaka ku swi twisisa. Kutani loko hi tsandzeka ku twisisa swilo leswi vumbiweke hi Xikwembu, hi nga va hi ri swihunguki leswoyini loko hi rhandza ku twisisa leswi enteke swa Xikwembu. Kambe, loko Xikwembu xi hi dyondzisa swona hi fanela ku swi yamukela hi ku pfumela. Hi vonile leswaku Biblele ya hi dyondzisa leswaku Yesu i Xikwembu. A hi nge swikoti ku swi twisisa kambe hi nga pfumela hikuva Xikwembu xa hi dyondzisa. Xihlamariso hileswaku Xikwembu xi faneriwa hi ku ta laha misaveni enyameni ku ta tshama exikarhi ka vanhu, ni ku ta fela swidyoho swavona leswaku va kuma vutomi bya laha ku nga heriki loko va pfumela eka xona.

NYIKO YA XIKWEMBU - KU VONAKALA KA MISAVA

**KU LAVEKA LESWAKU U HLAYA KHWATSI TINDZIMANA LETI
LANDZELAKA.**

Varhoma 9:5

Marka 2:1-12

1 Vakorinto 1:21

Vafilipiya 2:9-11

2 Vakorinto 5:19

Mintirho 14:8-18

Pisalema ya 51:4

Mintirho 20:28

Yohane 5:17-23

Yohane 20:27-29

Yohane 1:1

Nhlavutelo 19:10, 20:27-29

DYONDZO 4.

YESU A A RI MUNHU LA NGA RI KI NA XIDYOHU

Ndzimana ya ku yi Hlayisa hi Nhloko:

“..hi loyi a ringiweke hi matlhlelo hinkwawo ku fana hina, ntsena yena a nga dyohanga.” Vaheveru 4:15.

RITO RO RHANGA

Eka dyondzo ya vumbirhi ni ya vunharu hi dyondzile mayelana ni vukwembu bya Yesu. Hi vonile leswaku a a ri N’wana ni leswaku i Xikwembu nakambe. Eka dyondzo leyi hi ta dyondza hi leswi Bibeke yi dyondzisaka swona mayelana ni vumunhu bya Yesu. Hi ta leswaku Yesu a a ri munhu ku fana na hina hi tindlela hinkwato ehandle ka ku va yena a nga ri na xidyoho. A kuva hi ta twisisa kunene ta xiyimo xa Yesu, hi ku sungula hi fanela ku twisisa leswaku yena a a ri hinkwaswo Xikwembu ni munhu kambe.

Hi nga ehleketa mhaka leyi hi ndlela leyi. Loko munhu a ri ni cheleni evokweni ra yena. A ta va na a tiva leswaku i mali yin’we ntsena a nga na yona. Na swona wa switiva leswaku mali yi ni mathlelo mambirhi. Hi ku endla loko xiyimo xa Yesu xi nga ringanisiwa hi ndlela leyo. Matshamela ya Yesu a ma ri man’we ntsena kambe xiyimo xa yena a xi ri ni mathlelo mambirhi -- thlelo ra vukwembu ni thlelo ra vumunhu.

Na hi ri karhi hi dyondza mayelana ni vumunhu bya Yesu, hi fanela ku tsundzuka nakambe emiehleketweni ya ya hina ta vuKwembu bya yena.

YESU A A RI MUNHU

Kutani hi voneni swilo swin’wana leswi Bibeke yi hi byelaka swona leswi swi hi kombisaka leswsaku nayena yesu a a munhu.

1. Yesu a tsvariwile hi wansati ku fana na hina. Hambu leswi Xikwembu xi ve ke Tata wa yena kambe a vumbiwile ekhwirini ra Mariya. A kurile, naswona a tsvariwile tani hi swin’wana swihlangi (Vagalatiya 4:4). Luka 1:31; 2:6-7.

2. Miri wa Yesu a wu fana ni wa hina. Hi tiva mhaka leyi hi swi vangelo leswi landzelaka:
 - (a) A kurile ku sukela evutsongwanini ku ya fika laha aveke nkulu tani hi vanhu van'wna (Luka 2:52).
 - (b) A twile ndlala ni torha tani hi vanhu hinkwavo (Matewu 4:2; Johane 19:28).
 - (c) A twile mikarhalo tani hi vanhu van'wna (Yohane 4:6).

3. Ku ti twa ka Yesu enyameni a a ku fana na hina.
 - (a) A xukuvarile eku feni ka munghanu wa yena ku ko a rila (Yohane 11:34-36).
 - (b) A va twele vusiwana lava xanisekaka. (Matewu 9:35, 36).
 - (c) A a twa ku vava ni ku va a hlunama loko a vona ku dyoha ka munhu. (Marka 3:5).

TANI HI MUNHU, YESU A RINGIWILE HI NDLE LEYI HINA HI RINGIWAKA HA YONA

Yesu a thyiwa muprista lonkulu wa hina. (Vaheveru 4:14, 15). Akuva a va muprista wa hina a fanela ku tiva ku tsandzeka ka hina. Tindzimana leti ti hi byela leswaku a ringiwile tani hi leswi hi ringiwaka na hina. A hi faneri ku ehleketa Yesu a ringiwile ntsena loko Satani a tile eka yena endzhaku ka ku titsona swakudya hi masiku ya mune wa makume ni vusiku bya mune wa makume. Yesu a ringiwile hi makhambi layo hambana hambana ni hakanyingi.

Hi karhi wun'wna Satani a ringetile ku nghena hi ka Petro un,we wa vadyondzisiwa va yena. Loko Yesu a byerile vadyodzisiwa va yena mayelana ni ku xanisiwa ni ku fa ka yena loku a ku ri ku suhi, Petro a nwi yalerile. Petro a byerile Yesu leswaku mhaka leyi a yi nga ta endleka ni siku ni rin'we. Hi nkarhi lowo Satani a a tirhisa Petro eku ringa Yesu leswaku a papalata rifo exihamban'wini, hileswaku swi nga koteki kuva vanhu va ponisiwa. Yesu a twisisile leswi Satani a nga ha lavile ku ringeta ku swi endla hi Petro. Lexi hi xona xivangelo lexi a xi endleke hi Petro.

(Matewo 16:21-23). Hina hinkwerhu hi fanela ku twisisa mhaka leyi. Hi nkarhi wun'wana Satani a ta hi ringa hi thlelo ra vanghanu va hina. Satani a rhandza ku hi tshineta kule ni Xikwembu.

Ku ni mhaka leyi hi fanelaka ku yi twisisa mayelana ni ringiwa ka Yesu. A yarile ku tirhisa matimba ya yena akuva miringo yi ta n'wi vevukela. Kute loko a twa ndlala Satani a n'wi ringile leswaku a nxinxa maribye ku endla vuswa. Yesu a a ri ni matimba ya ku swi endla swoleswo. Yesu a yarile ku tirhisa matimba ya yena leswaku a oloveriwa hi miringo leyi a tiseriweke hi Satani. Hikwalaho ka yini? Hileswaku a a nga ti ringiwa nakambe hi ndlela leyi na hina hi ringiwaka hayona. Kunene a a ta va a humile emirini wa ku fana ni hina. Hi xifaniso, loko munhu a ri ni ndlala kutani a wutla kumbe ku yiva a a ta tilwela hi ku vula leswaku, "Ina enkarhi lowu Yesu a nga twa ndlala a nxinxile maribye ku endla vuswa a dya. Mina a ndzi na matimba ya ku swi endla leswo, hi kuendla loko ndzi yivile akuva ndzita xurhisa ndlala ya mina". Hikwalaho kakuva Yesu a lwisanile ni matimba makulu ya miringo ya Satani, wa twisisa ta kuringiwa ka hina. A ta hi nyika matimba ya ku hlula Satani loko kunene hi n'wi tshemba.

YESU AVE NI VUTOMI LEBYI NGA RI KI NA XIDYOHU

Hlaya tindzimana leti landzelaka: Vaheveru 4:15; 2 Vakorinto 5:21; 1 Petro 2:22. Leyi hi yona yin'we ya tindlela leti ha tona Yesu tani hi munhu, a a nga fani ni vanhu hinkwavo. Vanhu hinkwavo vadyohile. Yesu a nga dyohanga.

Vanhu lavotala va tsandzeka ku tiva leswaku kuni tindlela timbirhi leti munhu a dyohaka hatona. Ndle ya ku sungula ku endla swilo leswi hi tivaka leswaku a swi lulamanga. Bibeke yi hi byela swin'wana leswi Xikwembu xi nga laviki kuva hi swi endla. Loko munhu a yala kuendla ku rhandza ka Xikwembu kutani a endla swilo leswi a ta ve a dyohele Xikwembu. Hi ku endla loko xidyoho i ku endla swilo leswi hi swi tivaka leswaku swi bihile.

Ndlela ya vumbirhi leyi hi dyohaka ha yona i ku tshika kuendla swilo leswi hi tivaka leswaku swi lulamile. Xikwembu xa hi byela leswaku ku ni swokarhi leswi hi fanelaka ku swi endla. Kutani loko hi nga swi endli hi ta ve karhi hi dyohela Xikwembu. Eka Yakobe 4:17 hi kuma rito leri, "Loko

swi ri tano, la tivaka ku endla leswo saseka kambe a nga swi endli, o ni vudyoho”.

Loko hi vula leswaku Yesu a a nga ri na xidyoho, hivula leswaku a nga endlanga leswo bila emahlweni ka Xikwembu. Naswona hi vula leswaku a endlile hinkwaswo swo lulama emahlweni ka xikwembu hi mikarhi hinkwayo. A nga dyohanga na katsongo. A nga tsandzekanga ku endla leswinene.

ERISIMA BYA KUVA YESU A NGA RI NA XIDYOHU

Eka 2 Vakorinto 5:21, hi kuma leswaku Yesu la nga tivangiki xidyoho Xikwembu xi n’wi endle xidyoho hinkwalaho ka hina, hi ta hlayiwa lava lulameke emahlweni ka Xikwembu. Loko Yesu a a dyohile, a nga ti ringaniwa hi ku fa ematshan’wini ya mudyohi. A a ta fanela ku avanyisiwa hikwalaho ka swidyoho swa yena ha yexe.

Hi xifaniso, a hi nga ku vavanuna vambirhi va dlayile munhu. Ka ku loko mhaka ya vona yi xuxiwa ku voniwa leswaku kunene va ni nandzu wa vudlayi. Kutani un’we ka vona a ku eka muavanyisi ‘Hosi ndzi tshikeni ndzi fa ematshan’wini ya munghanu wa mina loyi’. Kwalaho muavanyisi a nga hlamula a ku, Ahihi. Hinkwenu hi vumbirhi bya n’wina mi ni nandzu. Loyi a fanela ku fela nandzu wa yena na wena u ta fa hikwalaho ka nandzu wa wena.

Yesu tani hi munhu la nga ri ki na nandzu, a nga dyohanga. A a nga ringaniwi ku xanisiwa hikwalaho ka xidyoho. Lexi hi xona xivangelo lexi endleke leswaku yena tani hi munhu la nga dyohangiki, a kota ku kuxaniseka emathsan’wini ya hina hikwalaho ka swidyoho swa hina.

KU LAVEKA KUVA U HLAYA KHWATSI TINDZIMANA LETI LANDZELEKA

Vaheveru 4:14-15	Yohane 19:28, 4:6	Marka 3:5
Vafilipiya 2:5-8	Matewu 4:2, 9:35-36, 16:21-23	John 10:30
Yohane 11:34-36	2 Vakorinto 5:21	Yakobo 4:17
Vagalatiya 4:4	Luka 1:31, 2:6-7, 52	1 Petro 2:22

DYONDZO 5.

YESU I RITO RA XIKWEMBU.

Ndzimana ya ku yi Hlayisa hi Nhloko:

“Rito ri hundzukile munhu la nga aka exikarhi ka hina; kutani hi hlalele ku kwetsima ka yena loku nga tala tintswalo ni ntiyiso, ku nga ku kwetsima loku fanelaka n’wana loyi a nga yexe eka tata wa yena.” Johane 1:14.

RITO RO RHANGA

Loko hi hlaya ndzimana leyi ya Yohane 1:1-14 hi karhi hi hlaya ta Rito. Swi nga endleka miehleketo yi ta eka wena, Xana Rito lero himani? Ndzimana ya hina ya ku yi hlayisa hinhloko yi ta hi nyika nhlamulo leyinene. Hi twa leswaku Rito ri endliwe nyama kutani ri aka exikarhi ka hina. Kutani ha swi twisisa swinene leswaku Rito hi Yesu. Kambe hikwalaho kayini Yesu a thyiwa Rito? Hi nga kambisisa mhaka leyi hi ndlela leyi. A hi nga ku wena u ni mhaka leyi u yi ehleketeka embilwini ka wena - kutani unga swikotisa kuyini ku tivisa vanghanu va wena mhaka leyi? U fanela ku va byela. U ta tirhisa marito akuva vanghanu va wena va kota kutiva leswi u nga na swona.

Xikwembu xi rhumile Yesu, Rito, ku ta tivisa hungu ra yena evanhwini. Hi yena Yesu la hi tivisaka kunene leswi nga embilwini ya Xikwembu Yesu a tivisile hungu ra Xikwembu hi tidyondzo ta yena ni hi mitirho ya yena. Hixona xivangelo xa kuva Yesu a thyiwa Rito. Rito ra Xikwembu eka vanhu hinkwavo ni va tinguva hinkwato. Hi ku endla loko hi vona leswaku “Rito” i rin’wana ra mavito layo hambana hambana ni ya kudzunisa ha wona Yesu. Kutani a hi nga voneni entiyiso yin’wana mayelana ni Xikwembu hilaha Yesu a tikombisaka eka hina tani hi Rito ra Xikwembu hakona.

YESU A KOMBISA VUMUNHU BYA XIKWEMBU KUNENE

Yesu a te, “L’a ndzi voneke a vonile Tatana...” (Yohane 14:9). Vanhu lavotala va vitisa etimbilwini ta vona, “kasi Xikwembu xi na xiyimo muni? Swi nga karhata kunene ku hlamusela ta xiyimo xa munhu-- ngopfu ngopfu

loko munhu loyo a ri Xikwembu. Swi nga antswa loko hi vona munhu wakona.

Hi leswi kunene swi endliweke hi Yesu. Xikwembu xi pfumelerile leswaku hi xi vona eka Yesu Kriste. Vaprofeta va Testamente ya Khale va ringetile hi tindlela leto tala eku hlamusela vanhu ta xiyimo xa Kwembu. Leswi va swi vuleke hiswona kambe va tsandzekile ku hlamusela hinkwaswo mayelana ni Xikwembu. Ntsena a swi ta twisiseka hi loko ku voniwa Xikwembu kunene. Munhu a vonisisile ni ku twisisa ta Xikwembu eka Yesu Kriste. Ina, Yesu a ve Rito ra Xikwembu leswaku Munhu a ta tiva ta xiyimo xa Xikwembu.

YESU A KOMBISILE KUNGU RA XIKWEMBU RA KU PONISA

Vanhu va misava hinkwayo va swirhandza ku tshama ni kusuhi ni Xikwembu etimbilwini ta vona. Va swi tiva leswaku vadyohele Xikwembu. Va switiva leswaku xidyoho xi vangela ku onheka ka hinkwaswo exikarhi ka vona Xikwembu. Va sungula ku tivutisa, “Ndzi nga lulamisa timhaka ta mina ni Xikwembu hi ndlela yihi? Ekuringeteni ka vona ku lulamisa timhaka tavona leto va endla swilo leswo hambana hamabana. Van’wana vagandzela vafi. Van’wana hi ku endla loko vagandzela swifaniso. Van’wana va hisa timhamba leti hanyaka. Van’wana va landza tidyondzo ta vanhu. Kuhava ni xin’we aka hinkwaswo leswo lexi lulameke. Loko munhu a rhandza kuponisiwa hi Xikwembu, a nga faneri ku landza ta miehleketo ya yena kumbe ya un’wana munhu. A fanela kudyondzela ku landza ndlela ya Xikwembu.

Yesu i Rito ra Xikwembu emunhwini mayelana ni ndlela ya ntiyiso ya kuponisiwa. Ndlela yihi ni yihi ya kuponisa leyi hambanaka ni leyi Xikwembu xi yi nyikeke vanhu hi Yesu Kriste i ya mavunhwa. Yesu a te, “...Hi mina ndlela ni ntiyiso, ni vutomia ku na munhu la nga taka ka Tatana, loko ku nga ri ha mina. (Johane 14:6).

YESU A KOMBISA KU RHANDZA KA XIKWEMBU EVUTON’WINI BYA VAKRISTE

Hi vonile leswaku Yesu i Rito ra Xikwembu emunhwini naswona a kombisa ndlela ya Xikwembu ya kuponisa munhu. Naswona Yesu i rito ra Xikwembu eka loyi a ponisiweke leswaku loko munhu a ponisiwile a ta

tiva mahanyela lawa a fanelaka ku ma landza. MuKriste a fanela ku hlaya Bibeke khwatsi. A fanela ku dyondza ta vutomi bya Yesu. A ta vona leswaku ku rhandza ka Xikwembu a a ku ri ehenhla ka hinkwaswo evuton'wini bya Yesu. Yesu loko a ri karhi a ehleketa hi ta ku xanisiwa ka yena exihambanwini a khongerile, "... Jesu zvaakafunga napamusoro pokutambudzwa kwake paMuchinjikwa, akanamata kuna Mwari, "... Tatana loko i ngi swi nga endleka leswaku xinwelo lexi xi hundza kule na mina! Kambe ku nga tshuki ku endliwa ku ku rhandza ka mina a ku endliwe ku rhandza ka wena" (Matewu 26:39). Loko a ku ri ni ndlela ya ku papalata ha yona tinxanisa ta le xihambanwini, Yesu na a balekile. Kambe ku xuva kayena loku tlulaka ku baleka tixanisa leti taka ave kurhandza kuendla leswi rhandziwaka hi Xikwembu. Hikwalaho ku kuva Yesu a rhangetise ku endla kurhandza ka Xikwembu, hi kumile ndlela ya kuponisiwa ni sweswi.

Hi fanela ku tsundzuka mhaka leyi. Yesu a a ri Rito ra Xikwembu eka vanhu. A nga byelanga vanhu ntsena leswaku va fanela kuyingisa Xikwembu, kambe a kombisile ndlela ya hilaha va fanelaka ku yingisa hakona. Vafanela ku swi endla hi ku rhangetisa ku endla ku rhandza ka Xikwembu ku tlula swilo hinkwaswo evuton'wini ra vona.

YESU A KOMBISILE NTIYISO YA VUTOMI ENDZHAKU KA RIFU

Hlaya Johane 14:1-6.

Mudyondzisi wa xikole a nga ka a nga dyondzisi tidyondzo leto nononhwa eka vadyodzi va buku ya ku sungula. Hikuva ku sungula va fanela kunyikiwa tidyondzo ta ku olova. Ku ta ku loko va dyondzisiwile tidyondzo leto ta masungulo va ta ve va tilulamiserile ku yamukela tidyondzo letikulu. Testamente yaKhale yi fana ni buku ya ku sungula. Masungulo hinkwawo ya ntiyiso ma dyondzisiwa eka yona naswona ntiyiso leyi yi fanela ku dyondzisiwa khwatsi. Kambe eka Yesu hi kuma ku twisisa ta Xikwembu ni ta vutomi lebyi nga heriki. Dyondzo mayelana ni ni vutomi lebyi nga heri yi lerivaleni ngopfu ku tlula eka Testamente ya Khale. Yesu a ve yena Rito ra Xikwembu leri dlunyatiseke timhaka leti hinkwato eka hina.

Hi ta dyondza leswotala mayelana ni vutomi endzhaku ka rifo eka dyondzo ya vukhume nan'we ya tidyondzo leti. Sweswi, a swi hetiseke etimbilwini ta hina leswaku Yesu i Rito ra Xikwembu eka hina. Loko kunene hi swirhandza ku twa mayelana ni vutomi endzhaku ka rifo hi fanela ku n'wi yingisa.

YESU HI YENA RITO RA XIKWEMBU RA VUGAMO EKA VANHU

Loko ntiyiso yohetelela yi vuriwa, a ka ri na xivangelo xa kuva ku engeteriwa swin'wana ehenhla ka yona. Xikwembu xi vulavurile ntiyiso ya ku hetiseka mayelana na xona Xikwembu haxoxe, kuponisiwa, swin'we ni mahanyela ya vuKriste hi Yesu Kriste. Eka Vakolosa 1:15 ku ni mhaka leyi hlayekaka mayelana na Yesu, hi ndlela leyi: “Hi yena a nga xifanio xa Xikwembulexi nga voniwiki...” Xikwembu xa tikombisa hi ku hetiseka hi Yesu Kriste.

Hi ku endla loko, loko munhu a rhandza ku tiva ntiyiso myelana ni Xikwembu a fanela kudyondza ka Yesu Kriste. Vanhu van'wana va tile vari eka vona Xikwembu xi va byerile swin'wana swilo swa ku tlula leswi tsariweke eBibeleni. Hi leswaku va ni Bibeke ni swin'wana swilo ehenhleni ka ka Bibeke. **LAWO I MAVUNHWA.** Ku tikombisa ka Xikwembu loku hetisekeke ku leka Yesu Kriste.

Loko xifaniso xihi ni xihi xi hetile ku pendiwa, swin'wana swilo loko swi nga engeseriwa eka xona swi ta xionhetela. Xikwembu xi kombisiwa hi ku hetiseka eka Yesu. Hinkwako nkwako loko vanhu va ringeta ku engesela kumbe ku pumba swokarhi eka xifaniso xa Xikwembu lexi hi xi vonaka eka Yesu Kriste vo onhetela xifaniso lexo.

Xikwembu xi vekile erivaleni timhaka leti yelanaka ni lava ringeteka ku hundzulusa Bibeke hi tindlela tin'wana. Ebukwini ra vugamo ra Bibeke ku tsariwile leswaku mani na mani la engeselaka swokarhi ebukwini leyi a hi wa Xikwembu. Ndzi tiyisa vumboni bya mina eka un'wana ni un'wana la yingisaka vuprofeta bya buku leyi, leswaku loko munhu a yi engetela, Xikwembu xi ta engetela ehenhla ka yena emakhombo la matsariweke bukwin leyi kutaniloko un'wana a hunguta timhaka tin'wana ta buku ya vuprofeta lebyi, Xikwembu xi ta hunguta ku averiwa ka yena e murini wa

vutomi, ni mutini lowo kwetsiama swi nga leswi tsariweke bukwini leyi.
(Nhalvutelo 22:18-19)

**KU KULAVEKA U HLAYA KHWATSI TINDZIMANA LETI
LANDZELAKA.**

Yohane 1:1-14

Yohane 14:1-6, 9

Matewu 26:39

Vakolosa 1:15

Nhlavutelo 22:18-19

DYONDZO 6.

YESU A NI MATIMBA HINKWAWO

Ndzimana ya ku yi Hlayisa hi Nhloko:

Kutani Yesu a va tsinelela, a vulavula na vona, a ku: “Ndzi nyikiwile vuhosi hinkwabyo etilweni ni la misaveni.” Matewu 28:18 .

RITO RO RHANGA

Yesu a a vambiwile exihamban’wini. Hi siku ra vunharu a a pfukile ekufeni. Hi xipimo xa mune wa makume ya masiku a a hlanganile ni vadyondzisiwa va yena hi mikarhi ya kuhambana hambana. Vadyodzisiwa volavo va swi tivile leswaku Yesu loyi a nga ha vambiwile ni ku lahliwa esirheni a a pfukile ekufeni. A a va n’wi vonile. A a va vulavurile na yena. A a va n’wi khwimbile hi mavoko ya vona. Endzhaku ka masiku ya mune wa makume yesu a vitanile vadyondzisiwa va yena ku hlengeletana navona. Na a vulavula na vona a vurile marito lawa hi ma vonaka eka ndzimana ya hina ya ku yi hlayisa hi nhloko ka dyondzo leyi:

“Ndzi nyikiwile vuhosi hinkwabyo etilweni ni misaveni.” A rhandzile leswaku va ta kota ku twisisa swinene mayelana ni matimba ya yena. Hi ku endla loko, kute loko a hetile ku vulavula ni vadyondzisiwa va yena, a thlandlukile a ya tilweni. Va yimile kwalaho va langutile na a nyamalala emarhefani.

VaKriste a va gandzeri Muponisi la feke a va a lahliwa swi hela kwalaho. Va tirhela N’wana wa Xikwembu la nga ni matimba hinkwawo, la pfukeke kufeni, naswona wa hanya. Yesu na a ha ri misaveni a kombisile matimba ya yena hi maendlela ya ku hambana hambana. Eka dyondzo leyi hi ta dyondza hi tindlela ti nga ri ti ngani leti Yesu a kombiseke ha tona matimba ya yena. Hlaya Vakolosa 1:16-17.

YESU A NI MATIMBA EHENHLA KA SWIVUMBIWA HINKWASWO

1. Hi tiva leswi hi loko hi vona matimba ya yena ya miyeta xidzedze ni lwandle. (Matewu 8:23-27).

2. Hi tiva leswi hi loko hi vona matimba ya yena ya ku famba henhla ka mati (Yohane 6:16-21).
3. Hi tiva leswi hi loko hi vona matimba ya yena loko a andzisile swinkwa swa thlanu ni tinhlampfi timbirhi kuva swi ringana ku xurhisa thlanu wa makhulu ya va vanhu. Ku te loko vanhu hinkwavo va dyile, ku sarile mathlathla yo ringana ku tata swirhundzu wa khume na swimbirhi. Yesu a nga xurisanga ntsena thlanu wa makhulu ya vanhu hikuva mathlathla la ma saleke a ma andzile kutlula swinkwa ni tinhlampfi leto swa ku sungula (Yohane 6:5-14).
4. Hi tiva leswi hi loko hi vona matimba ya yena loko a lerisa nsinya lowu nga vekangiki mihandzu kuva wu woma Matewu 21:18-21).
5. Yesu a nga va nga ni matimba ya ku vumba tilo ni misava ntsena kambe a a ri ni matimba ya ku sivelela swilo leswi hinkwaswo kuva swi nga herisiwi. Misava leyi hi nga ka yona sweswi na yi herisiwile loko a ku nga ri hi matimba ya Yesu. Siku rin'wana ni rin'wana ha pfumeleriwa ku tshama laha misaveni hikwalaho ka matimba ya yena. (Vakolosa 1:16, 17).

YESU A NI MATIMBA EHENHLA KA MIMOYA YA THYAKA

Bibele ya hi dyondzisa leswaku kuni mimoya ya thyaka leyi tirhelaka Satani Bibele yi hi dyondzisa nakambe leswaku matimba ya Yesu i makulu kutlula matimba ya mimoya leyi. Munhu la hlayisiwaka hi matimba ya Yesu wa swikota ku hlula matimba hinkwawo ya Satani.

Eka Testamente leyi Ntshwa ku ni matsalwa layo tala la ma vulavulaka hi vukulu bya matimba ya Yesu la ma tlulaka ya Satani ni ya mimoya hinkwayo ya thyaka. A hi nga hlayeni ndzimana yin'we ya matsalwa lawa. Hlaya khwatsi eka Luka 8:26-40. Matsalwa lawa ma hlawuriwile hikuva hiwona makombisaka kwatsi etirho wa Satani. Ntirho wa Satani i wa ku lovisa. I muvengi wa Xikwembu ni wa hinkwaswo leswi tsakisaka Xikwembu. Loko mademona ya Satani ma tshamile embilwini ya wanuna loyi a ma ri karhi ma tirhela ku n'wi herisa. Yesu a ma hlongirile hi matimba ya yena. Ma yile ma ya tshama ehenhla ka tinguvuve leti nga ha ri karhi ti dya kwalaho kusuhi. Ma endlile leswaku tinguluve letiya tiya

tilovisa elwandle lomu ti peleke kona. Ina, matimba ya Satani i ya ku lovisa hinkwaswo leswinene hi mikarhi hinkwayo.

Hi thlelo rin'wana, matimba ya Yesu ma kona hi mikarhi hinkwayo ku pfuna lava navelaka ku amukela kupfuniwa hi yena. Hikwalaho ka kuva matimba ya Yesu ma nga makulu swonghasi ku hundza matimba ya Satani, ha swi kota ku kuma kupfuniwa hilaha hi vilelaka hakona.

YESU A NI MATIMBA EHENHLA KA MAVABYI

Vanhu lavo tala va hanyisiwile hi matimba ya Yesu. A hi nga nxuvukeni va nga ri va ngani:

1. Nhlokonho a ma ri mavabyi lawa ma nga kotiki kudyahiwa emikarhini ya Yesu. Eka Marka 1:40-44 hi hlaya mayelana ni munhu la nga ha vabya hi nhlokonho a teke ka Yesu ku ta kombela ku pfuniwa. Yesu a n'wi hanyisile hi ku n'wi khwimba hi voko ra yena.

2. Eka Marka 5:25-34 hi kuma mhaka ya wansati la nga ha vabya hi malembe ya khume na mbirhi. A a yile ka tinyanga leto tala ni ku hangalaha mali ya yena hi ku lavetela kuhanyisiwa. Kuhava la nga swikota ku n'wi pfuna. Kambe loko a khwimbile nguvo ya Yesu a hanyile hi nkarhi wolowo.

Ku ni timhka tin'wana ta ku hanyisiwa ka vanhu va ku vabya leti ti endlekeke hakanyingi hi nga ka hi nga ti fikeli sweswi eka dyondzo leyi. Kambe ku leswi hi fanelaka ku swi twisisia swinene emitimbilwini ta hina. Kuhava mavabyi lawa Yesu a nga mahluleka. A a ri matimba ya ku hetelela ehenhleri ka mavabyi hinkwawo.

YESU A NI MATIMBA YA KU RIVALELA SWIDYOHU

Xivutiso lexi xi tolovela kuvekiwa, xana ndzi nga rivaleriwa hi ndlela yihi eka swidyoho swa mina? Van'wana va tshemba leswaku va ta rivaleriwa hi loko va tivula swidyoho swa vona eka muprista. Van'wana vatshemba leswaku va nga rivaleriwa loko va tiendla swirho swa kereke yo karhi. Ku ni van'wana lava ehleketaka leswaku va ta rivaleriwa hi ku khuvuriwa ematini. Bibe le yi dyondzisa leswaku kuhava nchumu ni wun'we wa hinkwaswo leswo wu nga ni matimba ya rivalela swidyoho.

Yesu hi yena ntsena a nga ni matimba ya ku rivalela swidyoho. Hlaya kambe eka Marka 2:1-12. Xiyisisa swinene ndzimana ya 10. Yesu a nga vulanga ntsena leswaku a ni matimba ya kurivalela swidyoho kambe a kombisile leswaku a ni matimba lawo. A hanyisile wanuna la nga tisiwa eka yena.

Loko wena u ri karhi u lava ku rivaleriwa swidyoho va na ni ntiyiso ya leswaku kurivaleriwa ku huma ka Yesu Kriste ntsena. (Vaefesa 1:7; Mintirho 4:12; ni Mintirho 10:43).

YESU A NI MATIMBA EHENHLA KA RIFO

Hlaya tindzimana leti landzelaka: Matewu 9:23-26; Luka 7:11-17; swin'we na Yohane 11:1-46. Ka ndzimana yin'wana ni yin'wana ka leti hinkwato hi kuma ta nyikiwa vutomi hi Yesu loku endleriweke munhu la nga ha file. A va nga titivalanga ntsena. Emhakeni ya wanhwanyana ku vuriwa leswaku a a file ku ri khale laha maxaka a a mahlanganile ku ta n'wi rila swin'we ni vandyangu lowo. A va ri karhi va yisa n'wana wa noni emasirheni ku ya lahla miri wa yena esirheni. Lazaro a a file laha ku nga ni mune wa masiku naswona a a lahliwile ku ri khale. Makwavo wa yena a vurile leswaku kutani nyama ya yena a yi sungurile kubola. Yesu a kombisile matimba ya yena ehenhla ka rifu hi ku thlerirsela vutomi eka hinkwavo lava.

Ka dyondzo ya vuthlanu na mune hi ta dyondza swin'wana mayelana ni matimba ya Yesu ehenhleni ka rifo. Hi ta vona leswaku a a ri ni matimba ya ku teka vutomi bya yena hayexe ni kuva a ri ni matimba ya ku nyika vutomi eka hinkwavo lava faka

a hui tsakeni hina vaKriste. Hi hanya hi kutshemba ni ku landzela la tlulaka kuva mudyondzisi lonkulu ntsena kumbe muprofeta. N'wana wa Xikwembu wa hanya naswona a ni matimba hinkwawo etilweni ni misaveni.

KU LAVEKA LESWAKU U HLAYA KHWATSI TINDZIMANA LETI
LANDZELAKA.

Vakolosa 1:16-17

Luka 7:11-17

Matewu 8:23-27

Matewu 28:18, 9:23-26

Yohane 6:5-14

Yohane 11:1-46

Luka 8:26-39

Marka 1:40-45

Marka 5:25-34

Marka 2:1-12

Vaefesa 1:7

Mintirho 4:12, 10:43

DYONDZO 7.

YESU I XINYEMPFANA XA XIKWEMBU.

Ndzimana ya ku yi Hlayisa hi Nhloko:

‘Siku leri thlandlamaka, Yohane a vona Yesu a ri karhi a ta a n’wi kongomile, kutani a ku: “Vonani! Hi lexi Xinyimpfana xa Xikwembu lexi susaka swidyoho swa misava!”’ Yohane 1:29.

RITO RO RHANGA

Eka dyondzo leyi hi ta dyondza mayelana na Yesu -- Xinyimpfana xa Xikwembu. Emikarhini ya Testamente ya Khale xinyimpfana a xi tirhisiwa tani hi mhamba leyi endleriwaka ku dyoha, Xikwembu a xi nyikile vanhu wileriso leswi nga ha fanela ku landziwa mayelana ni ti mhamba na swona vanhu a va swi landza kunene. Hi ku endla loko Yohane Mukhuvuri a vulavurile hi Yesu tani hi “Xinyimpfana xa Xikwembu” marito lawa a ma ri ni ntikelo eka lava va ma tweke. Akuva marito lawa ma vulavuleke hi ta Yesu ma ta twisiseka eka hina, hi fenela ku dyondza mayelana ni swinyimpfana tani hi timhamba ta Testamente ya Khale. Loko kunene hi ta twisisa mhaka leyi swi ta hi nabyarela ku twisisa leswaku Yesu hi mani ni leswi a hi endleleke.

LAVEKO YA XINYIMPFANA

Eka Testamente ya Khale ku ni milawu leyotala leyi Xikwembu xi yi nyikeke vanhu xa xona. A ku ri ni swilo leswi va nga faniriki ku swi endla. Nakona a swi ri kona leswi va nga ha fanela ku swi endla. Loko munhu a tiva leswi laviwaka hi Xikwembu a va a nga swi endli a a tava a dyoherile Xikwembu. Xidyoho i ku tshika ku endla ku rhandza ka Xikwembu hi ku xuva ku endla ku rhandza ka hina. Hlaya Esaya 53:6.

Kutani a hi nga tsundzukeni hi ta un’we wanuna la nga va kona mikarhini ya Testamente ya Khale. Wanuna loyi a a dyoherile Xikwembu. Endzhaku ka swona a sungurile ku titwa leswaku a dyohile kava loko a sungula ku ehleketa a ku, “Ndzi ta endla yini?” A yile eka

muprista a ya ku, “Ndzi dyohile emahlweni ka Xikwembu. Ndzi ta endla yini?”

Muprista a a ta n’wi byela leswaku xidyoho i nandzu emahlweni ka Xikwembu. Xidyoyo xi fanela ku khatsiwa. Mudyohi a fanela ku khatsiwa hikwalaho ka xidyoho xa yena loko swi ngaritano ku fanela kuva kona lexi xi ta ka khatsiwa ematshan’wini ya yena. Hi ku ya emahlweni muprista a a ta n’wi byela leswaku Xikwembu xi nyikile ndlela ya kuva xinyimpfana xi dlayiwa i ri ku rihela nandzu wa xidyoho. Hi marito man’wana xinyimpfana, a a xi dlayeriwa chidyoho xa loyi a xi endleke. Xidyoho a xi ta rivaleriwa hi mukhuva wolowo (hlaya Levhitika 4:32-35)

A hi nga ku kutani munhu loyi a vutisa, “Kambe- hosi, ndzi tshikeni ndzi tivula swidyoho swa mina eka n’wina, naswona ku swi lava mi nga ndzi rivalela” Muprista a ata hlamula, “ A swi koteki. Mayelana ni ndlela ya Xikwembu, laha ku nga ni xidyoho ku fanela kuva ni rifo i ri ku riha nandzu wa xidyoho”.

Kambe munhu loyi a ya mahlweni hi ku kombela, ‘Kambe, hosi yanga, loko ndzi tshembisa leswaku ndzi nga ka ndzi nga ha endli kambe xidyoho xa muxaka lowu ndzi nga ka ndzi nga rivaleriwi ke na ku nga thlabyiwanga xinyimpfana xa mina? Muprista a a ta hlamula, A swi koteki, xidyoho xa wena xi endliwile na khale. Naswona hi ndlela ya Xikwembu kuva xidyoho xa wena xi rivaleriwa ku laveka ku halaka ka ngati. (Vaheveru 9:22). Hi vugamo munhu loyi a a ta twisisa leswi nge loko a lava ku rivaleriwa ka xidyoho a fanela ku landza ndlela ya Xikwembu. Ndlela ya kona i ya kuthlabyiwa ka xinyimpfana.

MUXAKA WA XINYIMPFANA LEXI NGA HA LAVEKA

Xikwembu xi vekile rivaleni eBibeleni leswaku ku laveka xinyipfana lexolulama. Xinyimpfana lexi limaleke kumbe lexi nga lulamangiki hi mugkhuva wihi ni wihi a a xi nga yamukeriwi hi Xikwembu. Loko Xinyimpfana xi tisiwa muprista a a ta xi lavisisa khwatsi kuva a vona leswaku kunene xi ta va na xi hetisekile tani hi swileriso swaTestamente ya Khale.

Yesu tani hi Xinyimpfana xa Xikwembu, a a lulamile. A a nga ri na xivi. Xikwembu ha xoxe xi n'wi setchile. “Loyi i N’wana la rhandzekaka loyi ndzi n’wi tsakelaka” (Matewu 3:17). Hi ku endla loko Yesu la lulameke la nga ri ki na xisandzo a vonekile na a ri la lulameleke ku endla ku rhandza ka Xikwembu leswaku a va yena Xinyimpfana xa mhamba ya hina.

KU FA KA XINYIMPFANA EMATSHAN’WENI YA MUDYOHU

Endzhaku ka loko munhu a tisile xinyimpfana eka muprista, muprista a a xi lavisisisa. Loko kunene xinyimpfana lexo xi pfumeleriwa hi muprista, a ku fanela ku endleka swilo swimbirhi. Xa ku sungula munhu loyi a a fanela ku thandleka mavoko ya yena ehenhla ka xinyimpfana na a tivula xidyoho xa yena. Leswo a swi kombisa leswaku xidyoho lexi vuriwaka xa susiwa eka munhu loyi xi vekiwa eka xinyimpfana. Xa vumbirhi hileswaku xinyimpfana lexi tekeke nadzu wa xidyoho xa munhu loyi a xi ringaniwa hi ku fa Muprista a a teka xinyimpfana a xi dlaya hi mukhuva lowo a nyikiweke hi Xikwembu. Xinyimpfana lexi nga tivangiki kudyoha a xi fela nandzu wa munhu.

Leswi hi swona swi endleke kunene loko Yesu a fa exihamban’wini. Tani hi Xinyimpfana xa Xikwembu, a tekile swidyoho swa hina ehenhla ka yena. A xanisiwile a thlela a fa hikwalaho ka swidyoho swa hina leswi swi endleriwe kuva hi kuma ku rivaleriwa swidyoho swa hina ni kuva hi va ni vutomi lebyi nga heriki. Hlaya khwatsi 2 Vakorinto 5:21.

NDLELA YA KU RIVALERIWA HA YONA SWIDYOHU

Na hi nga si pfala dyondzo leyi hi fanela ku twisisa timhaka leti landzelaka. Timhaka leti a ti ri ni ntiyiso emikarhini ya Testamente ya Khale ni swesw swa ha ri tano. Loko munhu a ri karhi a lavetela ku rivaleriwa hi Xikwembu leswi landzelaka swi fanela ku endleka:

1. A fanela ku tiva leswaku a dyohele Xikwembu (Varhoma 3:23).
2. A fanela ku tisola embilwini ya yena hikwalaho ka kudyoha kutani a va ni ku swirhandza ku tshika ku dyoha. Xikwembu a xi amukeri mhamba loko munhu wa kona a nga hundzukanga hakunene (Amosi 5:21 -24).

3. A fanela ku amukela ndlela ya Xikwembu leyi xi rivalelaka ha yona. Ku ni ndlela yin'we ntsena ya ku rivalela a nga Xinyimpfana xa Xikwembu, Yesu Kriste. Hlaya Pisalema ya 51:17.

Tani hi leswi kutani hi twisisaka ta mayelana ni xinyimpfana xa mhamba, kutani ha swikota ku twisisa khwatsi leswi vuriweke hi Yohane Mukhuvuri loko a huwelela leswaku, Yesu i Xinyimpfana xa Xikwembu. A a vula leswaku Yesu a a ri Muponisi la nga ri ki na xidyoho loyi a rhumiweke hi Xikwembu kuva a ta va yenna mhamba ya hina.

KU LAVEKA U HLAYA KHWATSI TINDZIMANA LETI LANDZELAKA

Yohane 1:29

Pisalema ya 51:17

Levhitika 4:32-35

Esaya 53:6

2 Vakorinto 5:21

Vaheveru 9:22

Vaheveru 7:27

Matewu 3:17

Varhoma 3:23

1 Petro 3:18

DYONDYO 8.

YESU HI YENA MUPONISI.

Ndzmana ya ku yi Hlayisa hi Nhloko:

Ú ta veleka n'wana wa mufana, kutani wena u ta n'wi thya vito ra Yesu; hikuva hi yena loyi a nga ta ponisa tiko rakwe eswidyohweni swa rona. Matewu 1:21.

RITO RO RHANGA

Eka dyondzo ya vuthlanu na mbirhi hi dyondzile mayelana ni leswi endliweke hi Yesu kuva a hi ponisa. A file tani hi Xinyimpfana xa Xikwembu hikwalaho ka swidyoho swa hina. Hi xona xivangelo xa kuva hi n'wi thya 'Muponisi'. Eka dyondzo leyi hi ta dyondza mayelana ni kuva Yesu a ri Muponisi ni ta kuponisa ka yena loku nga hakeriwiki ha nchumu na a nyika eka hinkwavo lava hundzukaka eswidyohweni swa vona ni kuva va n'wi tshemba kunene.

YESU HI YENA NTSENA MUPONISI

Hakanyingi ku endliwa xivutiso lexi, "loko munhu a ri wa ripfumelo rin'wana tani hi Mohammedanism, Hinduism, ni swin'wana swa ku fana naswona xana a nga ka a nga ponesiwi ke?" Nhlamulo mayelana ni Bibeleyi ri "A swikoteki, Yesu N'wana wa Xikwembu hi yena ntsena la ponisaka".

A hi nga ku munhu a ka rhi a lulamisa riendzo ra ku sukela Maputo na a ya Xaixai. Ku ni ndlela yin'we ntsena leyi ya ka kona. Kutani munhu loyi a phazama eku ehleketeni ka yena loko a ha lulamisa riendzo leri. Eku phazameni kakwe a teka ndlela ya kuva yi nga ri yona. A teka leyi yaka mupela dyambu eRessano Gracia ku nga ri leyi kongomaka n'walungu le Xaixai. A tiyisa leswaku kunene a le ndleleni ya ku ya lomu a kongomaka ku ya kona. Hambu loko a tshembeka hi tindlela hinkwato a nga ka a nga fiki Xaixai hi ndlela leyio. Vanhu lavotala va fana ni munhu yoloyi a vulavula na va tiyisile kambe vo tikanganyisa. Eka Swivuriso 14:12 hi kuma marito lawa, 'Ndlela yikona leyi vonekaka ingi yi lulamile, Kasi makumu ya yona ma yisa kufeni.'

Yesu wa swi veka erivaleni leswaku akuna munhu loyi a yaka eka Xikwembu loko a nga hundzi hi ka yena. (Yohane 14:6).

Eka Mintirho 4:12 hi kuma leswi, “Kutani ku ponisiwa a ku kumeki eka munhu un’wana, hikuva vanhu a va nyikiwanga vito rin’wana laha misaveni, ehandle ka vito ra Yesu, leri hi fanelaka ku ponisiwa ha rona.”

matsalwa lawa hi ma voneke laha henhla ma hi dyondzisa leswaku loko munhu a tshemba swilo swin’wana ehandle ka Yesu Kriste na a ku a ta ponisiwa a ta va na a lahlekile ndlela.

YESU WA HI PONISA EXIDYOHWENI

Leswi hi fanelaka ku switwisisa mayelana na Yesu tani hi Muponisi hileswi-- Yesu wa hi ponisa evudyohweni. Vanhu van’wana va kombisa kupfumela ka leswaku loko va ta eka Kriste va ta ponisiwa va nga ha vabyi ni siku ni rin’we, ni tixanisa va nga ha kumeki ka tona. Ka ku loko mavabyi kumbe tixanisa ti va fikela, va sungula ku ehleketa leswaku Yesu a ta va a tsandzekile ku va endlela leswi a fanelaka ku va endlela swona. Leswi swi endleka hikuva va nga twisisanga leswaku Yesu i Muponisi wa maendlela wahi. Loko hi hlaya eBibeleni mayelana ni vutomi bya vadyondzisiwa va Yesu hi vona leswaku vona va xanisiwile swinene. Van’wana va vona va biwile. Van’wana va yisiwile emakhotsweni. Van’wana va dlayiwile ni ku dlayiwa. Swilo leswi hinkwaswo swi endlekile eka vona hukuva va ri valandzeri va Yesu ku nga ri leswaku va onhile swokarhi. Hambi swiritano a va khunguvanyekanga. A va tiva leswaku Yesu a va ponisile eswivini swa vona ni leswaku va ni kaya ra hilaha ku nga heriki etilweni lomu va nga ta ya tshama na yena. Kutani a hi nga ehleketeni khwatsi swin’we mayelana ni kuponisiwa loko ekudyoheni.

1. Yesu wa hi ponisa eku avanyisiweni ka hina hikwalaho ka ku dyoha. Hlaya Matewu 25:46; Luka 16:19-31; Nhalvutelo 20:11-15. Eka tindzimana leti hi kuma leswaku ku ni ndhawu ya ku xaniseka hilaha ku nga heriki eka lava nga pfumeriki ndlela ya Xikwembu hi navela ku tifambela hi tindlela ta vona ta vudyoho. Ku khatisiwa hilaha ku nga heriki hi yona hakelo ya xidyoho kumbe ku khatisiwa ka xidyoho. Yesu a file exihamban’wini a va a xaniseka ematshan’wini ya hina akuva hi nga ha rhwali nadzu wa kudyoha ka hina.

Hikokwalaho ha vona leswaku Yesu wa hi ponisa eku avanyisiweni ka xidyoho.

2. Yesu wa hi ponisa ematimbeni ya xidyoho. Vanhu lava ringetaka ku susa xidyoho evuton'wini ra vona va switiva leswaku xidyoho xi ni matimba swinene. Va swi vona leswaku va hava matimba ya ku xi susa. Loko munhu a ri ka Yesu Kriste, wa ponisiwa ematimbeni ya xidyoho. Yesu a veka Moya wa yena lowo Kwetsima embilwini ya muKriste. Kutani mukriste wa swikota ku hlula xidyoho hi matimba ya Yesu (Vafilipiya 4:13).
3. Yesu wa hi ponisa kuva hi huma ndzeni ka xidyoho. Munhu wa ku va a nga ri muKriste wa xi rhandza xidyoho. A lavetela tindlela hinkwato ta ku dyoha ha tona. Swa endleka a rhandzisa ku ya emabangeni. Kumbe ku rhandza mitlango ya makhaza, vuoswi ni swin'wana swidyoho swa ku fana na swona. Loko ku nga rina ndlela ya ku dyoha ha yona mulahleki a nga tsaki.

Kambe muKriste a nga tano. A ni mbilu leyintshwa. A rhandza leswaku ku rhandza ka Xikwembu ku endleka evuton'wini ra yena. Hi ku endla loko evukona bya xidyoho i maxangu lamakulu eka yena. Kambe hi rin'wana siku Yesu a ta ponisa hinkwavo vaKriste hi ku va susa evukoneni bya xidyoho ni ka tixanisa hinkwato leti vangiwaka hi xidyoho. Yesu a ta teka vaKriste kuva va ya tshama swin'we na yena etilweni hi mikarhi hinkwayo. Etilweni ku ta va ku nga ri na mavabyi, ku khunguvanyeka rifo, ndlala, kumbe tixanisa tihi na tihi. (Hlaya Nhluvutelo, xiahluko 21 na 22.)

Ha tsandzeka ku twisisa ta ntsako u ta va kona endhawini leyi Xikwembu xi yi lulamiseleke vana va xona.

YESU A HI PONISELA VUTOMI BYA KU TIRHELA XIKWEMBU

Tani hi Muponisi, Yesu wa endla swinyingi leswi tlulaka ku hi ponisa exidyoweni. Wa hi ponisa na a ri ni nkongometo -- hileswaku hi ta hanya vutomi lebyi tsakisaka Xikwembu. Rin'wana siku mufundhisi wokarhi a a vulavula ni van'wana vavanuna mayelana ni xidyoho lexi nga ha tiveka swinene exikarhi ka vona. A xi ri xidyoho lexi va nga ha tolovela ku xi

endla hi mikarhi leyo leha. A va nga tsundzuki leswaku a nga va xi ri xidyoho emahlweni ka Xikwembu. Mufundhisi a va hlamuserile ta vubihi bya xidyoho lexo. Kute loko a hetile ku vulavula, un'we wa vavanuna volavo a ku eka mufundhisi, “Kambe ku laveka hi va ni timbilu letintshwa na hi nga si endla leswi mi hi dyondziseke swona”. Leswi hiswona swi endleriwaka munhu hi Yesu loko a n'wi ponisile. Wa n'wi nyika vutomi ni mbilu leyintshwa. Eka 2 Vakorinto 5:17 hi kuma marito lawa, “Loko munhu a ri ka Kriste, ku tumbuluka leswintshwa swa khale swi hundzile ku nghenile leswintshwa.”

Loko munhu a ri ni mbilu leyintshwa leyi a ta rhandza ku endla ku rhandza ka Xikwembu. Edoropeni rin'wana ra leAmerica a kuri un'wana wanuna la nga ha ri mubihi swinene. A endlile vubihi lebyotala laha ka kuva loko a famba-famba vanhu hinkwavo a vo n'wi chava. Hi vusiku byin'wana wanuna loyi a yile ekerekeni kutani a nyiketa mbilu ya yena eka Yesu. A vekile kutshemba ka yena hinkwako ka Yesu akuva a ponisiwa. A siyile vanghanu va yena va vubihi ni mahanyela ya ku biha ya yena. A sungurule ku byela vanhu van'wana hi ta Yesu ni leswaku va nga ponisiwa hi ndlela yihi. Xikwembu xi tirhisile wanuna loyi hi ndlela ya ku hlamarisa endzhaku ka kuva a tivile Yesu tani hi Muponisi wa wayena.

Paulo a tsalerile vaKriste va leKorinto a ku, “Xana a mi swi tivi leswaku miri wa n'wina i tempele ya Moya lowo Kwetsima lowu mi nga na wona, lowu Xikwembu xi mi nyikeke wona, ni leswaku a mi tifumi xana? Mi xaviwile hi nxavo lowukulu; hikokwalaho dzunisani Xikwembu hi miri wa n'wina”. (1 Vakorinto 6:19, 20).

KU LAVEKA LESWAKU U HLAYA KWATSI TINDZIMANA LETI
LANDZELAKA

2 Vakorinto 5:17

Swivuriso 14:12

Yohane 14:1-3, 6

Mintirho 4:12

Matewu 25:46

Vafilipiya 4:13

1 Vakorinto 6:19-20

Matewu 1:21

Nhlavutelo 20:11-15

Luka 16:19-31

Nhlavutelo 21

Nhlavutelo 22

DYONDZO 9.

YESU HI YENA MUHLURI WA RIFO

Ndzimana ya ku yi Hlayisa hi Nhloko:

“...ni loyi a hanyaka. A ndzi file, kambe vona, sweswi ndzi loyi a hanyaka hilaha ku nga heriki. Ndzi ni swilotlelo swa rifu ni swa xivandla xa vafi.” Nhlavutelo 1:18.

RITO RO RHANGA

Ku sukela eku sunguleni ka mikarhi, vanhu va tivile rifo tani hi nala la nga hluriwiki. Vanhu va ringatile ku papalata rifo hi tindlela tinyingi hi mikarhi hinkwayo kambe ku fika laha rifo ri va fikelaka ri va hlula.

Eka dyondzo leyi hi ta dyondza mayelana na yesu tani hi muhluri wa rifo. Hi vona ni leswaku Yesu a pfumerile hi mukhuva wiyi kuva vanhu va vubihi va n’wi dlaya. Hi ta vona ni leswaku a lahliwile ni ku pfuka esirheni hi ndlela yihi hi siku ra vunharhu. Hita dyondza nakambe leswaku ku hlula ka yena rifo ku ni nhlamuselo muni eka hina.

YESU A KOMBISILE MATIMBA YA YENA EHENHLA KA RIFO HI KU NYIKA VUTOMI EKA VAN’WANA LA VA NGA HA FILE

Edyondzweni ya vunharhu hi ndyondzile leswaku Yesu a ni matimba hinkwawo etilweni ni laha mivaveni. Yin’we ya tindlela leti a kombiseke hatona matimba ya yena i ku thlerisela vutomi eka vanhu vanharu lava nga ha file. A hi nga ehleketeni katsongo maeyelana ni kuendleka ka mhaka leyi hi makhambi lawa ya manharhu.

Eka Matewu 9:23-26 hi dyondza hi ku fa ka wanhwanyana. Vanghanu a va hlanganile endyangwini wa vatswari va yena ku ta n’wi rila swin’we na vona. Yesu a va byerile leswaku wanhwanyana loyi a a nga fanga kambe a a etlerile ntsena, kutani va n’wi hleka. A va vonile miri wa wanhwanyana loyi. Va tivile leswaku a a file. Yesu a yile endlini laha n’wana a nga ha latiwile kona. A n’wi khomile hi voko kutani a n’wi thlerisa vutomi bya

yena tani hileswi hi pfuxisaka xiswona n'wana evurhongweni, Yesu a swi kotile ku vitana n'wana loyi a pfuka eku feni.

Eka Luka 7:11-17 hi dyondza leswaku Yesu a hlanganile ni tlawa wa vanu lava nga ha ya eku lahleni ka munhu. Wanuna loyi a a ri n'wana un'we ntsena wa noni. Kutani mana wa dyaha leri a a twerisa vusiwana hikuva a a sarile a ri yexe Yesu a n'wi twerile vusiwana. Yesu a lerisile mufi leswaku a pfuka kunene a n'wi yingisa. Vonani ku tsaka loku ve ke kona eka vanhu hinkwavo.

Eka Yohane 11:1-46 hi byeriwa hi ku fa ka Lazaro. A a ri munghana wa Yesu. Maria naMarta a va ri vamakwavo va Lazaro. Va rhumerile rito leswaku Lazaro a wa vabya. Yesu loko a fika endyangwini wa vona, Lazaro a a file ku ri khale. A a file laha ku nga ni mune wa masiku. Maxaka ni vanghanu va yena a va n'wi lahlile ku ri khale. Yesu a va byerile ku vumbuluta ribye leri nga ha pfarile sirha. Kuta a lerisa Lazaro kuva a huma. Hi ku hlamula rito ra Yesu N'wana wa Xikwembu -- Lazaro a humile esirheni hi mikondzo yakwe.

Yesu a kombisile matimba ya yena hi ku thlerisela vutomi eka lava nga ha file. Kambe lexi a hi xona xikombiso lexikulu xa matimba ya yena. Xikombiso lexikulu hi lexi xi nga ha landzela. Xana yena Yesu ha yexe, a a ta fa a thlela a hlula rifo ke?

YESU A THSEMBISILE LESWAKU A TA HLULA RIFO

Na swi nga si endleka Yesu a a swi tiva leswaku a ta dlayiwa. A a switiva nakambe leswaku hi siku ra vunharhu a ta pfuka (Matewu 16:21; Matewu 26:32; Marka 9:9, 8:31, 9:31, 10:33-34).

Yesu a byerile vadyondzisiwa va yena hinkwaswo leswi na swi nga si endleka. A swi endlile leswaku loko ku ta fika siku ra ku tatisa xithsembiso xa yena xa ku pfuka eka lava feke, vadyondzisiwa va yena va ta kota ku pfumela eka yena hi ku hetiseka (Johane 14:29).

YESU A FILE KUNENE

Loko kunene hi tsakela ku hlula rifo ka Yesu, hi fanela ku twisisa leswaku Yesu a file kunene. A nga titivalanga kumbe ku endla tani hi loyi a feke. A hi kambisiseni timhaka leti landzelaka. Hlaya khwatsi Luka 23:32-56;

na Luka 24:1-53; swin'we na Yohane 19:16-42; Yohane 20:1-31; Yohane 21:1-25.

1. Yesu a file emahlweni ka vanhu lavotala a nga felanga endhawini ya xihundla laha ku nga ri ki na vanhu kumbe timboni kumbe laha ku nga ni nhlayo yitsongo ya vanhu. Vanhu hinkwavo va Yerusalema ehandle ka nhlayonyana ntsena va tile ku ta vona ku vambiwa ka Hosi exihamban'wini. Emiehleketweni ya vanhu lava a ku va nga ni ku ganaganeka. Va swi tivile leswaku kunene Yesu a file exihambanwini.

2. A ku ri ni mitlawa minharhu leyi nga ha tile ku ta vona leswaku Yesu a file hakunene - wa ku sungula i wa masocha. Vavanuna lava a va tiva ku dlaya. A va tiva ku fa loko va kuvona. Va swi tivile leswaku a file. Un'wana wa vona a thlavile rheve ra Yesu hi thlari ra yena. Loko a endlile leswo, ngati ni mati swi humile. Llexo a ve xikombiso xa leswaku Yesu a file hakunene. Tlawa wa vumbirhi, a wu ri wa vavengi va Yesu lava nga ha tile ku ta kuma ntiyiso ya ku fa ka yena. Na va nga pfumelanga kuva Yesu a susiwa exihambanwini na ku nga ri na ntiyiso ya leswaku a file. Wa vunharhu a wu ri wa lava rhandzaka Wa vunharhu a wu ri wa lava n'wi rhandzaka Yesu. Na vona va ve ni ntiyiso ya leswaku Yesu a file. Loko emavokweni ya vona a va twile xikombiso xa vutominyana emirini wa yena loko va ri karhi va lulamisela ku ya n'wi lahla emasirheni na va nga n'wi lahlanga. Kuhava ku ganaganeka emhakeni ya ku Yesu a a file hakunene.

YESU A PFUKILE EKUFENI HI SIKU RA VUNHARHU

Vavengi va Yesu va ringetile hi tindlela hinkwato ku sivelela ku ku pfuaka ka yena ekufeni. Ribye lerikulu ri vekiwile enyangweni ya sirha vathlela va veka ni mfungho ehenhla ka rona. Masocha na wona ma vekiwile kwalaho leswaku va rindza sirha leswaku ntsumbu wu nga tshuki wu yiviwa. Entirho lowo hinkwavo wa vona a wu va nga wa nchumu. Hi siku ra vunharhu sirha ri sarile na ri nga ri na nchumu. Yesu a a pfukile. Endzhaku ka ku pfuka ka yena, Yesu a ti kombisile hakanyingi eka vadyondzisiwa va yena. Va vulavurile na yena. Va n'wi khwimbile hi mavoko ya vona. Va swi tivile leswaku hi yena Yesu ni leswaku a a pfukile ekufeni. Yesu a a file. A lahliwile. A hlurile rifo. Kutani a a ri ntomi hilaha ku nga heriki.

HLAMUSELO WA KU HLULA KA YESU EHENHLENI KA RIFO

Ku ni swilo swimbiri leswi hi rhandzaka ku swi dlunyatisa eka dyondzo leyi mayelana ni ku pfuka ka Yesu eku feni.

1. Ku pfuka ka yena eku feni ku kombisa leswaku Yesu i n'wana wa Xikwembu. Leswo hi swi kuma eka Varhoma 1:4, “Kambe, hi thlelo ra moya wa yena lowu kwetsimaka, swi tikombile leswaku i N'wana wa Xikwembu la nga ni matimba hinkwawo, hi ku pfuka ka yena exikarhi ka vafi” - Yesu Kriste Hosi ya hina.

2. Yesu la nga ni matimba ehenhleri ka rifo, a ta pfuxa vanhu hinkwawo emasirheni hi siku ra makumu. Swin'wana leswo tala mayelana ni leswi ta endleka hi siku ra ku pfuka ka vafi hi ta swi kuma eka tidyondzo leti landzelaka. Yohane 5:28-29.

A hi tsakeni hina hikuva hi tirhela Muponisi la nga yena muhluri wa rifo. Wa swi kota ku hi ponisa eswidyohweni swa hina, ku hi pfuxa eku feni, ni ku hi yisa eku tshameni na yena hilaha ku nga heriki. A hi dyondzeni rito leri kutani hi ya pambulelana rona ni lava nga ri tiviki swin'we ni lava nga ri twisisiki.

KULAVEKA U HLAYA KWATSI TINDZIMANA LETI LANDZELAKA.

Yohane 11:1-46	Yohane 5:28-29	Yohane 14:29
Marka 8:31, 9:31	Yohane 20:1-31	Varhoma 1:4
Matewu 9:18-19, 23-26	Yohane 21:1-25	Luka 23:32-56
Marka 10:33-34	Yohane 5:28-29	Luka 24:1-53
Matewu 16:21, 26:32	Yohane 19:16-42	Nhlavutelo 1:18
Luka 7:11-17		

YESU I HOSI.

Ndzimana ya ku yi Hlayisa hi Nhloko:

“Hikokwalaho rixaka hinkwaro ra Vaisraele ri fanele ku tiva mhaka leyi swinene leswaku Yesu loyi mi n’wi vambeke, hi yena loyi Xikwembu xi n’wi endleke Hosi ni Mesiya.”
Mintirho 2:36.

RITO RO RHANDGA

Eka dyondzo leyi hi ta dyondza mhaka yin’wana ya ntiyiso mayelana na Yesu. Hi ta leswaku Yesu i Hosi. Bibeke hi dyondzisa leswaku munhu a nga ka a nga yamukeli Yesu tani hi Muponisi ehandle ka kuva naswona a n’wi yamukela tani hi Hosi. Yesu ha yexe a te, “...Loko munhu a lava ku ndzi landza, a a titshike, a tirhwexa xihambano xa yena siku rin’wana ni rin’wana, kutani a ndzi landza.” (Luka 9:23). Yesu a vulavurile marito lawa leswaku lava vaveke nkarhi va ehleketa ku n’wi rhandza va ta twisisa leswaku Kriste a hi nchumu wa ku olova hi mikarhi hinkwayo. Van’wana valandzeli va Yesu va ta hlangana ni ku nonon’hwa. Hi mikarhi yin’wana valandzeli va Yesu va hlangana ni timhangu letikulu. Yena Yesu ha yexe a hlanganile ni swilo leswi hinkwaswo naswona, hi vugamo, a dlayiwile hi ndlela ya ku karhata swinene -- ku vambiwa exihamban’wini. Tani hi valandzeli va Yesu, hi fanela ku rhandza ku famba endleleni ya Hosi ya hina ni ku endla ku rhandza ka yena hambani loko ku nga humelela yini na yini.

HLAMUSELO WA RITO RA KU ‘HOSI’

Ebibeleni, rito ra ku ‘Hosi’ ri ni hlamuselo leyikulu. Hi hundza vito ra ku dzunisa ha rona leri nyikiwaka munhu. Loko Bibeke yi tirhisa rito ra ku ‘Hosi’ yi vula leswi: Loko munhu a ri hosi ya nchumu wokarhi, enchumu lowo i wa yena naswona a ni matimba ehenhleri ka wona. A xi tirhisa hi laha a rhandzaka ha kona

loko wena u xava basikeni hi wena n’winyi wa rona, hi wena hosi ni n’winyi wa basikeni lero. Hi wena u nga ni matimba ya ku vula leswi ri

fanelaka ku tirhisiwa xiswona ni leswi ri fanelaka ku endleriwa swona. Kutani a hi nga ehlekeni swin'we mayelana ni vuHosi bya Yesu Kriste.

YESU I HOSI YA MUKRISTE UN'WANA NI UN'WANA

Hi lava ku hlamusela khwatsi swivangelo swimbirhi mayelana ni kuva Yesu a ri Hosi ya muKriste un'wana ni un'wana.

1. Yesu hi yena Hosi ya muKriste un'wana ni un'wana hikuva a hakerile nadzu wa ku kutsula muKriste un'wana ni un'wana ku n'wi susa exidyohweni ni le ku avanyisiweni ka xona ka hilaha ku nga heriki. Eka 1 Vakorinto 6:19-20 hi kuma marito lawa ma hlayekaka hi ndlela leyi, "Xana a mi swi tivi leswaku miri wa n'wina i tempele ya Moya lowo Kwetsima lowu mi nga na wona, lowu Xikwembu xi mi nyikeke wona, ni leswaku a mi tifumi, xana? Mi xaviwile hi nxavo lowukulu; hikokwalaho, dzunisani Xikwembu hi miri wa n'wina." Nakambe hi kuma mhaka ya ku fana eka 1 Petro 1:18-19, "Ma swi tiva leswaku mi kutsuriwile eka tindlela leti nga pfuniki nchumu, leti mi ti kumeke eka vatata wa n'wina; mi kutsuriwile ku nga ri hi swilo leswi onhakaka ku fana ni silivhere kumbe nsuku, kambe hi ngati ya nkoka ya Kriste, leyi fanaka ni ya xinyimpfana lexi nga riki na vulema kumbe xivati." Hi ku endla loko hi vona leswaku Yesu a ni matimba ehenhleri ka vutomi bya muKriste un'wana ni un'wana hikuva a byi xavile hi ku fa ka yena exihamban'wini.

2. Yesu hi yena Hosi ya muKriste hikuva munhu un'wana ni un'wana la hundzukaka ni ku yamukela Yesu tani hi Muponisi wa n'wi amukela nakambe tani hi Hosi. Xin'we xa leswi nga ha laveka eka vaKriste va mikarhini ya Testamente Leyintshwa a ku ri ku vula vumboni bya kuva Kriste a ri Hosi ya vona. (Hlaya Varhoma 10:9). Hi vona leswaku vaKriste hinkwavo a va tiva vuhosi bya Kriste loko hi hlaya eka 1 Vakorinto 8:6, "Eka hina ku ni Xikwembu xin'we ntsena Tatana loyi swilo hinkwaswo swi taka hi le ka yena, na hina hi hanyelaka yena; naswona ku ni Hosi yin'we ntsena, Yesu Kriste loyi hinkwaswo swi taka hi le ka yena na hina hi hanyaka hinkwalaho ka yena."

VAKRISTE VA FANELA KU YINGISA YESU TANI HI HOSI YA VONA

Vanhu van'wana va rhandza kuvula Yesu tani hi Hosi ya vona hi milomu ntsena. Yesu a nga swi yamukeli swoleswo. Eka Luka 6:46 Yesu wa vutisa, “Xana mi ndzi vulela yini: Hosi, Hosi xana kasi a mi endli leswi ndzi mi byelaka swona!”

Yesu a vulavurile nakambe mayelana ni mhaka leyi eka Matewu 7:21, “a hi hinkwavo lava nge ka mina ‘Hosi Hosi’ lava nga ta nghena eMufun'wini wa matilo, kambe ku ta nghena lava endlaka ku rhandza ka Tata wa mina la nge matilweni.”

Loko munhu a yamukela Yesu tani hi Hosi ya yena hakunene wa n'wi yamukela Yesu tani hi Hosi ya vutomi bya yena evuton'wini hinkwabyo. Laha muKriste afikaka eku tiveni ka ku endla leswi rhandziwaka hi Xikwembu eka swienge hinkwaswo swa vutomi bya yena, a ta swi endla kunene. Swa nonon'hwa kuva hi vulavula hi swilo hinkwaswo leswi Yesu a rhandzaka kuva hi swi endla. Kambe hi ta khwimba swi nga ri swi ngani.

1. Yesu a rhandza leswaku muKriste a n'wi vula tani hi Muponisi ni Hosi MuKriste a nga fanele kuva ni tingana ha Yesu. (Hlaya Matewu 10:32-33).
2. Yesu a rhandza leswaku vutomi bya muKriste byi hanyiwa hi ndlela ya ku dzunisa Xikwembu. (Hlaya Matewu 5:14-16).
3. Entirho wa muKriste lowu a wu endlaka ni mitlango leyi a yi tlangaka swi fanela ku yelana ni kurhandza ka Xikwembu. (Hlaya 1 Vakorinto 10:31).
4. Yesu a ni kungu ehenhleri ka muchato wa muKriste ni leswaku a fanela ku hanya himukhuva wihi endyangwini. MuKriste a fanela ku hlaya Bibeke ni ku dyondza swilo leswi a thlela a swi landza. (Sungula hi ku hlaya Vaefesa 5:22-33, 6:1-4).
5. Yesu a fanela kuva Hosi ya mali ya Mukriste. Xiyenge xin'we ntsena xa vukhume bya mali ya Mukriste xi fanela ku nyikeleriwa ntirho wa Xikwembu. (Hlaya Vaheveru 7:8). Mali leyin'wana leyi saleke yi fanela ku tirhisiwa hindlela leyi tsakisaka Xikwembu.

6. Yesu a fanela kuva Hosi ya nkarhi wa muKriste, muKriste a nga faneli ku khomeka laha ka kuva a pfumala ni nkarhi wa ku hlaya Bibeke (2 Timotiya 2:15), ku khongela (Matewu 26:41), ni ku ya ekerekeni (Vaheveru 10:25).

7. Yesu a rhandza leswaku muKriste un'wana ni un'wana a ya byela van'wana timhaka ta yena ni ndlela ya yena ya ku ponisa. (Hlaya Matewu 28:19, 20).

8. Yesu a rhandza leswaku muKristu un'wana ni un'wana a khuvuriwa na swona ni ku va ni ndhawu ya yena ekerekeni. Hlaya leswi endliweke hi lava ponisiweke emikarhini ya Testamenten Leyintshwa eka Mintirho 2:37-47.

HI SIKU RA MAKUMU VANHU HINKWAVO VA TA VULA LESWAKU YESU I HOSI

I ntiyiso leswaku vanhu vanyingi va ala ku yamukela Yesu tani hi Muponisi ni Hosi ya vona. Van'wana va hleka loko va vona muKriste la hanyaka mayelana ni ku rhandza ka Hosi Yesu Kriste. Rin'wana siku vanhu lava va ta kuma dyondzo hikwalaho ka ku dyoha loku va ku endleke. (Hlaya Vafilipiya 2:5-11). Loko va ta yima emahlweni ka Yesu eku avanyisiweni ni loko va vona Yesu na a tshamile exiluveweni xa yena xa vuhosi na a kongoma ku va avanyisa, hikona va ta ntsundzuka ku tixenga lokukulu va kuendleke. Kambe nkarhi wa ku hundzuka wu ta va wu hundzile.

Hi ro hetelela Hosi Yesu a ta yamukela lava nga n'wi yamukela tani hi Muponisi ni Hosi ya vona na va ha hanya emisaveni.

KU LAVEKA U HLAYA KHWATSI TINDZIMANA LETI
LANDZELAKA.

Luka 6:46	Vafilipiya 2:5-11	Malakiya 3:8-10
Luka 9:23	Vaefesa 5:22-33	Mintirho 2:36-47
Varhoma 10:9	2 Timotiya 2:15	1 Vakorinto 10:31
Vaefesa 6:1-4	Matewu 5:14-16	Matewu 28:19-20
Matewu 26:41	Vaheveru 10:25	Matewu 10:32-33
1 Petro 1:18-19	1 Vakorinto 8:6	Matewu 7:21, 23:23

DYONZO 11.

YESU I MUAVANYISI

Ndzimana ya ku yi Hlayisa hi Nhloko:

“Naswona Tatana a nga avanyisi munhu ni un’we, kambe u nyikle n’wana ntirho hinkwawo wo avanyisa” Yohane 5:22.

RITO RO RHANGA

Vanhu a va ta hlamala hi ku tiva leswaku va karhi va ti endla va avanyisi mikarhini leyi. Leyi i ntiyiso hakunene. Hi masiku hinkwawo vanhu va twa timhaka ta Yesu Kriste. Va swi twa leswaku Yesu a va ferile hi ndlela yihi ni leswaku va nga hundzuka hi mukhuva wihi ni ku n’wi yamukela tani hi Hosi ya vona. Loko va ri karhi va ehleketa leswi va nga swi endlaka va tiendla vaavanyisi va Yesu. Van’wana va phikisana na yena Yesu. Va n’wi kaneta.

EBibeleni hi hlaya mhaka ya un’we wanuna la nga avanyisa Yesu. Vito ra yena i Pontio Pilato. A twile timhaka ta Yesu. Kava loko a vutisa, “Ndzi ta endla yini hi Yesu la thiywaka Kriste? Guwa ra vanhu lava nga ha vavisekile ri twakarile na va ku Yesu a a vambiwe exihambanwini, Pilato a pfumerile ni ku tshika Yesu kuva a dlayiwa. Aa onhile hi ku tshikela valala va Yesu kuva va ri vona lava hlawulaka maavanyisela ya N’wana wa Xikwembu.

Hambi leswi vanhu va avanyisaka Yesu masiku lawa, Bibeke ya hi byela leswaku ra ta siku laha Yesu a ta ka avanyisa vanhu hinkwawo. A hi voneni leswaku Bibeke yi hi dyondzisa yini mayelana na Yesu tani hi Muavanyisi. Loko hi ri karhi hi dyondza swivutiso swi nga hi fikela emiehleketweni ya hina mayelana ni ku avanyisiwa. Hi fanela ku tiva leswaku Bibeke a yi byeli hinkwaswo mayelana ni ku avanyisiwa loku taka -- a hi wona ntirho wa yona. Bibeke yi hi byela mayelana ni ku avanyisiwa loku taka leswaku hi ta kota ku tilulamisela. Imhaka ya risima ku tiva ndlela ya ku tilulamisela ha yona ku avanyisiwa loko ku nga ri ku lavetela leswo tala mayelana ni ku tiva leswaku a ta ve rini ni swin’wana swa ku fana na swona.

YESU A TA PFUXA VANHU HINKWAVO HI SIKU RA MAKUMU

Hlaya khwatsi Yohane 5:26-30. Kutani a hi ehlekeni khwatsi mayelana ni leswi hi swi kumaka etindzimeni leti.

1. Xikwembu xi nyikile Yesu matimba ya ku avanyisa Mwari (Yoh. 5:27).
2. Ku avanyisa ka Yesu ku ta va loko lulama (Yohane 5:30).
3. Vanhu hinkwavo va ta pfuxiwa eku feni akuva va ta ya eku Avanyisiweni. Lavakulu ni lavantsongo va ta va kona. Vafuwi ni swisiwana va ta va kona. Lavo lulama ni lavo biha va ta va kona. Vanhu v tixaka hinkwato va ta va kona. Bibeke yi ri, "...Hinkwavo lava nge masirheni va nga twa rito ra yena, kutani va ta huma..." (Yohane 5:28-29).

VANHU HINKWAVO VA TA HLENGETANA EMAHLWENI KA XILUVELO XA MUA VANYISI

Hlaya khwatsi Matewu 25:31-46; Nhlavutelo 20:11-15. Nakambe matsalwa va ma hi veka erivaleni leswaku hinkwavo va ta va kona hi siku ra ku avanyisa. Kuha a ta baleka. A hi nga voneni swin'wana leswi ta ka endleka hi mikarhi yoleyo.

1. Ku ta va kona ku hambanyisiwa kwalaho. (Matewu 25:32-33). Ku hambanyisa loko ku ta yelana ni leswi munhu a ta ka va a endlile swona emoyeni. Eka matsalwa lawa, tinyimpfu i xikombiso xa vaKriste, kasi timbuti i xikombiso xa lava nga ponisiwangiki. Va hambanyisiwa na ku nga si hlamuseriwa ta mitirho ya vona ya ku saseka kumbe ya ku biha. Va vekiwa emitlaweni ya ku hambana mayelana ni leswi va nga xiswona. Kutani Kriste a ta huwelela eka mitlawa leyi mimbirhi. Mitirho ya vona yi ta kombisa matshamela ya vona ya ku ponisiwa kumbe ku lovisiwa. Mitirho ya vona ku nga ri marito ya vona hi yona yi ta ka kombisa leswi va nga xi swona emoyeni.

Eka Nhlavutelo 20:11-15 ha byeriwa nakambe leswaku ku hambanyisiwa ku ta va kona. Laha ku tirhisiwa marito ya maendlela man'wana eku hlamuseleni ka ntiyiso yoleyo ya yin'we. Lava nga ponisiwangiki va ta va ni mitirho ya vona leyi tsariweke ebukwini naswona va ta avanyisiwa mayelana ni mitiho leyo ya vona. VaKriste va ta va ni mavito ya vona

matsariweke ebukwini ya vutomi. Ku nchumu wun'we lowu ringanaka ku va wu twisisiwa na hi nga si ya emahleni. Ku hava vukanganyisi lebyi ta ka himelela eku avanyiseni loku. Hinkwaswo leswi endlekeke swi ta va na swi tiviwa. Yesu a yexe a ta va Muavanyisi.

2. Vakriste va ta yamukela vutomi lebyi nga heriki. Yesu wa veka eku baseni leswaku tinyimpfu ta yena, - lava nga ni mavito la ma tsariweke ebukwini ya vutomi, va ta nghena evuton'wini lebyi nga heriki swin'we na yena. Lava va ta ka va na va yamukerile Yesu tani hi Muponisi ni Hosi ya vona na va ha hanya emisaveni va ta yamukeriwa hi Yesu siku lero.

3. Lava nga pfumelangiki va ta avanyisiwa mayelana ni mitirho ya vona kutani va susiwa etilweni, va yisiwa endhawini leyi eBibeleni yi thiywaka Tihele.

Tin'wana tindzimana ta matsalwa ti ri munhu a ta avanyisiwa hi ku nga pfumeli evitweni ra Yesu. Hlaya Yohane 3:18. A hi nga vekeni mhaka leyi hi maendlela lawa: a hi nga ku wanuna un'wana a khomiwile na a endla swo biha. Kutani a bohiwa a yisiwa ka muavanyisi. Kava loko muavanyisis a landza mhaka ya kona ku voniwa leswaku kunene munhu loyi a ni nadzu. Wanuna loyi a fanela ku riha nadzu wa yena hi khulu ra tipondo kumbe ku ya ekhotsweni. Hi nkarhi wolowo ku humelela munghana wa wanuna loyi la navelaka ku n'wi hakelela nandzu lowo wa khulu ra tipondo. Kambe wanuna loyo a ala kuva a hakeleriwa nandzu lowu wa yena. Kutani muavanyisi a ku, "Hiswona ku kota leswi u alaka ku pfuniwa u fanela ku ya ekhotsweni." Kutani wanuna loyi kunene a yisiwa ekhotsweni. Loko ku vulavuriwa hi mhaka leyi un'wana a nga ku a yisiwile ekhotsweni hikwalaho ka vubihi lebyi a byi endleke. Un'wana nayena a ku a yisiwile ekhotsweni hi kuva a arile ku yamukela xipfuno lexi va n'wi nyikeke. Hikwavo hi vumbiri bya vona va ta va na va vulavula ntiyiso. Wanuna loyi a khotseriwile hikuva a endlile vubihi. A tshama enandzwini hikuva a arile xipfuno lexi a endleriweke.

Swi fana ni munhu la lahlekeke. Wa avanyisiwa hikwalaho ka swidyoho swa yena. Yesu a hakerile nandzu wa munhu wa ku lahleka hi ku n'wi fela exihamban'wini. munhu a arile ku yamukela kuponisiwa loku a ku nyikiweke, kutani munhu loyi a ta tshama ehansi ka ku avanyisiwa hikuva

a a rile ku yamukela Yesu. Kuhava murhi un'wana kumbe xitshembiso eka munhu la alaka ku yamukela nyiko ya Yesu ya ku ponisa.

Munhu la nga yamukeriki Yesu na a ha ri laha emisaveni, rin'wana siku a ta ya yima emahlweni ka yena Yesu. Yesu a ta va Muavanyisi wa yena. Loko a arile leswi Yesu a n'wi endleleke, Yesu, Muavanyisi, la lulameke, na yena a ta ala ku n'wi yamukela hi siku leri. Xikwembu a xi hi susumeteri ku landzela Yesu nakatsongo, Xikwembu a xi sindzisi munhu ku ya tilweni. Xikwembu xa hi nyika nkarhi ni wa ku tihlawulela ku ala ku yamukela tintswalo ta xona, kambe ku fanela kuva kona endhawu leyi ringanaka lava nga pfumeriki. Endhawu yakona i Tiva ra Ndzilo. Kambe Xikwembu a xi rhumeli munhu kwale, loyi a ya ka kona o tiyisa kona hikuva a arile rirhandzu ra Xikwembu.

Leswi tiyeke hileswaku etilo i ku ya emahlweni ka vutomi lebyi hanyiwaka swin'we ni Xikwembu ni leswaku Tiva ra Ndzilo i vutomi lebyi ta ka hanyiwa kule ni Xikwembu. Kambe hi tiyisa leswaku Xikwembu xi ta endla vuavanyisis lebyi lulameke.

KU LAVEKA LESWAKU U HLAYA KHWATSI TINDZIMANA LETI LANDZELAKA

Johane 5:22, 26-30

Yohane 3:18

Matewu 25:31-46

Nhlavutelo 20:11-15

DYONDZO 12.

YESU I WA VANHU HINKWAVO.

Ndzimana ya ku yi Hlayisa hi Nhloko:

“Hikuva Xikwembu xi rhandzile misava swonghasi xi ko xi nyika N’wana wa xona la nga ntswariwa a ri swakwe, leswaku un’wana ni un’wana la pfumelaka ka yena a nga tshuki a lova kambe a va ni vutomi lebyi nga heriki” Yohane 3:16.

RITO RO RHANGA

Ku sukela ekusunguleni Satani a kanganyisile Adam na Eva kuva va dyoha. Adam na Eva va kumile nandzu hikuva va tihlawulela ku landza mavunhwa ya Satani vanga hlayisi ntiyiso ya Xikwembu. Ku ya fika sweswi Satani a ha ya mahlweni hi ku yisa vanhu eswidyohweni hikwalaho ka mavunhwa ya yena. Man’wana mavunhwa lawa a ma vulaka ka vanhu va Africa masiku lawa hileswaku: “Yesu i Xikwembu xa lava ku basa ntsena ku nga Xikwembu xa vanhu vantima.” Lava yingisaka ni ku landzela mavunhwa wolawo va ta lova hilaha ku nga heriki.

Lava ehleketeke khwatsi ni ku hlaya Bibeke a va tshuki va kanganyisiwa hi mavunhwa lawo hinkwawo. Hinkweru ha swi tiva leswake ku ni Xikwembu xin’we ntsena. Hi xona Xikwembu xa vanhu hinkwavo hikuva hixona xi vumbeke vanhu hinkwavo. Bibeke nayona ya hi dyondzisa leswaku Xikwembu xolexo xin’we xi ni ndlela yin’we ntsena ya ku ponisa. Ndlela ya ku ponisa yoleyo yi lumba vanhu hinkwavo va misava. Tihosi ni tihosi ta xisati leti lavaka ku ponisiwa va fanela ku hundzuka ni ku tshemba Yesu Kriste tani hi Muponisi ni Hosi ya vona hi ndlela ya ku fana ni leyi xisiwana naxona xi pfumelaka ha yona. Mudyondzisi wa xikole xa le henhla a fanela ku hundzuka ni ku tshemba Yesu hi ndlela ya ku fana ni ya loyi a nga dyondzangiki. Munhu wa ntima, wa ku tshwuka, wa halande kumbe wa ku basa hinkwavo va fanela ku hundzuka ni ku pfumela ka Yesu hi ndlela ya ku fana loko va rhandza ku kuma vutomi lebyi nga heriki. Ina, kuni Xikwembu xin’we ntsena, ni ndlela yin’we ya ku ponisa.

Satani a vula mavunhwa a ku Yesu i wa lava ku basa ntsena. Xikwembu xi hi byela erivaleni eBibeleni leswaku Yesu i wa vanhu hinkwavo. A hi tweneni Rito ra Xikwembu mayelana ni mhaka leyi.

VAPROFETA VA VURILE LESWAKU YESU I KU VONAKALA KA MISAVA HINKWAYO

Hlaya Genesa 22:18; Vagalatiya 3:16. Ndzimana ya Genesa yi hi dyondzisa leswaku kungu ra Xikwembu a ri ri ra ku katekisa tixaka hinkwato ta misava hi mbewu (rito leringe “mbewu” leri tirhisiweke laha ri hlamusela endzalo ya Abraham. Endzimana ya vaGalatiya yi vulavula hi ta xutshembiso lexi hi dyondzeke ha xona ka Genesa. Swi le rivaleni leswaku “mbewu” leyi ta ka katekisa tixaka hinkwato ta misava i Yesu Kriste. Xikwembu xi dlunyatisile ka Testamente ya Khale leswaku Muponisi la tshembisiweke ka i wa misava hinkwayo.

Exiahlukweni xa 49 eka Esaya hi kuma vuprofeta mayelana ni xitshembiso xa ku ta ka Muponisi. Ka xienge xa vugamo xa ndzimana ya 6 mayelana ni xitshembiso xa Muponisi la taka hi kuma marito lawa, “... ndzi ta endla ha wena ku vonakala ka matiko, e ku fikiksa ku pona ka mina emakun’wini ya misava” (Esaya 49:6) kuhava ku ganaganeka emhakeni leyi -- Xikwembu xi kunguhata leswaku Yesu a ta va yena kuvonakala loku kombisaka ndlela ya ku ponisa vanhu hinkwavo va misava.

TINTSUMI TI VURILE LESWAKU YESU A TA VA WA TIXAKA HINKWATO TA VANHU.

Hlaya Luka 2:10-11. Tintsumi ti tile ku ta huwelela mahungu lawa ti nykiweke hi Xikwembu. Eka rungula ra tona leri humeke ka Xikwembu ti vurile erivaleni leswakuYesu hi yena Muponisi ni leswaku i va tixaka hinkwato.

YOHANE MUKHUVURI A VURIKE KESWAKU YESU A A RI WA TIXAKA HINKWATO

Yohane Mukhuvuri loko a ri karhi a lulamisela Yesu ndlela a vulavurile marito lawa: “Vonani! Hi lesxi Xinyimpfana xa Xikwembu lexi susaka swidyoho swa misava (Yohane 1:29). Yohane Mukhuvuri a twisisile leswaku Yesu a a nga telanga ku ta ponisa rixaka rin’we ntsena.

Xikwembu xi pfuleterile leswaku a tiva leswaku Yesu a a ta va Muponisi wa hinkwavo lava hundzukaka ni lava n'wi tshembaka.

YENA YESU HAYEXE A VURILE LESWAKU RITO RA KU PONISA A RI RI RA VANHU HINKWAVO

Na a nga si thlandlukela tilweni, Yesua vulavurile ni vadyondzisiwa va yena a ku, “Hikokwalaho yanani eka matiko hinkwawo, mi va endla vadyondzisiwa va mina mi va khuvula hi vito ra Tatana, ni ra N’wana, ni ra Moya lowo Kwetsima” (Matewu 28:19). Yesu a a ri karhi a byela vadyondzisiwa va yena leswa rito ra ku ponisa a ri ri ra vanhu hinkwavo.

XIKWEMBU XI NI NDLELA YIN’WE NTSENA YA KU PONISA VANHU HINKWAVO

A hi nga tsundzukeni mayelana ni ndzimana ya hina ya ku yi hlayesa hi nhloko ka dyondzo --Yohane 3:16. Eka yona hi twa leswaku Xikwembu xi rhandza vanhu hinkwavo. Kwalaho hi dyondza nakambe leswaku Xikwembu xi nyikele N’wana wa xona la nga un’we leswaku un’wana ni un’wana la pfumelaka ka yena a nga lovi, kambe a va ni vutomi lebyi nga heriki.

Satani a nga ringeta ku endla leswaku vanhu va pfumela eka mavunhwa ya yena ya leswaku Yesu i wa rixaka rin’we ra vanhu, kambe lawo i mavunhwa hakunene eka ntiyiso leyi hi dyondziswaka hi Xikwembu. Xikwembu xi swi veka erivaleni eRitweni ra yena leswaku Yesu i muponisi wa vanhu hinkwavo Munhu un’wana ni un’wana la hundzukaka ni ku tshemba Yesu a ta va ni vutomi lebyi nga heriki. A hi tshikeni ku xengiwa hi Satani. A hi pfumeleni ka Xikwewmbu.

KU LAVEKA U HLAYA KHWATSI TINDZIMANA LETI LANDZELAKA

Matewu 28:19

Genesa 22:18

Vagalatiya 3:16

Esaya 49:6

Luka 2:10-11

Yohane 1:29, 3:16

XIRHAMBO XA KU YAMUKELA YESU KRISTE

“Hinkwavo lava Tatana a ndzi nyikaka vona, va ta ta ka mina; ni loyi a taka ka mina, ndzi nga ka ndzi nga n’wi cukumeteli handle” (Johane 6:37).

Wena mudyondzi ni munghana la rhandzekaka u hetile ku dyondza tidyondzo ta khume na timbiri mayeelana na Yesu Kriste. U dyondzile eBibeleni leswaku Yesu himani. U dyondzile leswaku Yesu i n’wna wa Xikwembu ni leswaku a file akuva wena u ponisiwa eswidyohweni swa wena.

Swi nga endleka na u ri karhi u ehleketa embilwini ya wena leswaku, “Ina, kutani ndza swi tiva leswaku Yesu himani ni leswaku a ndzi endlele yini. Kambe a ndzi tiva leswaku ndzi nga n’wi yamukela hi ndlela yihi tani Muponisi wa mina?” Ndzi ta ku hlamusela.

Xaku sungula, u fanela ku tiva leswaku Yesu wa kurhandza. Yena wa swi rhanza ku kuponesa naswona lexi hixona xivangelo xa ku kufela ka yena. Sweswi yena a tiva hinkwaswo leswi nga mbilwini ka wena. A tiva hinkwaswo mayelana na wena. Wa swi tiva nakambe loko wena u rhandza ku siya swidyoho swa wena hinkwaswo hakunene u n’wi yamukela tani hi Hosi ni Muponisi wa wena.

Kutani u fanela ku hundzuka hakunene eswidyohweni swa wena. Leswi swi komba leswaku wa swi tiva leswaku u mudyohi, wa tisola hakunene embilwini ka wena, ni lewsaku wa swi rhandza ku siya swidyoho swa wena hinkwaswo u landzela Yesu. U rhanza ku endla ku rhandza ka Yesu ku tlula ku tiendlela ku rhandza ka wena.

Loko u tiyisile hakunene, Yesu a ta va a ku rindzerile ku ku yamukela ni kukuponisa eka swidyoho swa wena. Eka Yohane 6:37, Yesu wa tshembisa hi ndlela leyi::

“Hinkwavo lva Tatana a ndzi nyikaka vona, va ta ta ka mina;
ni loyi a taka ka mina, ndzi nga ka ndzi nga n’wi cukumeti
handle”

Xikwembu hixona xi rhumelaka Moya lowo Kwetsima ku ta vulavula embilwini ya wena. Moya lowo Kwetsima wa Xikwembu hi wona wu

vekaka ku rhandza embilwini ka wena kutani u hundzuka u va u siya swidyoho swa wena u ta eka Yesu.

Loko kunene u yingisa rito ra Moya lowo Kwetsima leri vulavulaka embilwini ka wena, kutani u ta ka Yesu, yena a ta kuyamukela.

Xana u nga swi kota ku khinsama u endla xikhongelo lexi eka Yesu ke?

“Hosi Yesu ndza swi tiva leswaku ndzi ku dyoherile hi mikarhi yo leha. Ndza swi tiva leswaku a ndzi lahlekile hikwalaho ka swodyoho swa mina. Ndzi hava matimba ya ku tiponisa. Ndza swi tiva leswaku u ndzi ferile kuva u ndzi ponisa eswidyohweni swa mina. Ndzi rhandza ku kulandzela. Ndzi lava kuva ndlela ya wena yi va ndlela ya mina. Ndza pfumela leswaku u ndzi ponisa, tani hi laha u tshembiseke hakona. Ndzakombela kuva u ndzi rivalela swidyoho swa mina hinkwaswo. Sweswi ndzi nyike matimba ya ku endla ku rhandza ka wena hilaha ku nga heriki. Hakunene hi wena Muponisi ni Hosi ya mina.

KU TIHLAWULELA KA MINA KU YAMUKELA KRISTE

Loko u endlile xikhongelo lexi ni kuva u fikile eku yamukeleni ka Yesu tani hi muponisi wa wena, hi rhandza kuva u hi tivisa ta ku tihlawulela loko ka wena ka kuva muKriste. Ndza ku kombela kuva u tatisa hi ku tsala eka ndhawu leyi nga kona laha hansi kutani u tsema xipapilana lexo u xi rhumela swin’we ni swikambelo swa wena.

A wu faneli ku swi endla ntsena kuva yi ri ndlela ya ku ta kuma hayona dipoloma.

=====

Tidyondzo leti ta Bibeletu ndzi pfunile kuva ndzi yamukela Yesu Kriste tani hi Muponisi wa mina. Ndzi rhandza ku mi tivisa ta ku tihlawulela ka mina embilwini ka mina.

Nhlayo ya Vudyondzi _____ Ntanga _____

Vito _____

Lomu u thsamaka kona _____